


Bosna i Hercegovina
Federacija Bosne i Hercegovine
KANTON SARAJEVO
**Kantonalni zavod za pružanje
besplatne pravne pomoći**



Bosnia and Herzegovina
Federation of Bosnia and Herzegovina
CANTON SARAJEVO
Cantonal Institute for Free Legal Aid

**IZVJEŠTAJ O RADU I FINANSIJSKI IZVJEŠTAJ
KANTONALNOG ZAVODA ZA PRUŽANJE BESPLATNE
PRAVNE POMOĆI ZA 2018. GODINU**

Sarajevo, mart 2019.godine



web: <http://zbpp.ks.gov.ba>
e-mail: zbpp@zbpp.ks.gov.ba
Tel: + 387 (0) 33 275-660, Fax: + 387 (0) 33 275-661
Sarajevo, Branilaca Sarajeva 21



IZVJEŠTAJ O RADU KANTONALNOG ZAVODA ZA PRUŽANJE BESPLATNE PRAVNE POMOĆI ZA PERIOD 01.01.2018. DO 31.12.2018.GODINE

I UVODNI DIO

Kantonalni zavod za pružanje besplatne pravne pomoći (u daljem tekstu: Zavod) osnovan je donošenjem Zakona o izmjenama i dopunama Zakona o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo" broj: 30/11), kao samostalna upravna organizacija Kantona Sarajevo te je utvrđen djelokrug rada i početak rada Zavoda. Donošenjem Zakona o pružanju besplatne pravne pomoći ("Službene novine Kantona Sarajevo" broj: 1/12) stvoren je pravni okvir i regulisani su oblici ostvarivanja besplatne pravne pomoći, korisnici besplatne pravne pomoći, postupci u kojima se pruža besplatna pravna pomoć, postupak u ostvarivanju prava na besplatnu pravnu pomoć i druga pitanja od značaja za rad Zavoda u pružanju besplatne pravne pomoći. Na taj način prepoznata je potreba i nužnost uvođenja besplatne pravne pomoći kroz reformu pravosudnog sistema, te u cilju osiguranja principa jednakosti i nediskriminacije građana, kao i ispunjavanja međunarodnih standarda kroz pristup pravdi pred sudom i drugim organima, **Vlada i Skupština Kantona Sarajevo su stvorile pravni i institucionalni okvir za uspostavljanje i rad Zavoda. Navedene aktivnosti su i ispunjavanje obaveza iz člana 8. stav 1. Ustava Kantona Sarajevo, kojim je regulisano: "Skupština će obezbjediti donošenje takvih propisa kojim će se u prvom redu zaštititi utvrđena ljudska prava i slobode, te uvesti efikasne instrumente zaštite".**

Takođe, u uspostavljanju i omogućavanju rada ovog Zavoda neophodno je istaći ostvarenu izuzetno uspješnu saradnju, te doprinos i podršku koju je dao UNDP kroz projekat "Pristup pravdi" i to se po podacima UNDP-a finansijski može iskazati u iznosu većem od 270.000,00 KM, što predstavlja najveću podršku, koju je kroz taj projekat dobio neki od vladinih zavoda ili NVO koji pružaju besplatnu pravnu pomoć u Bosni i Hercegovini.

Naime, prije otpočinjanja sa radom Zavoda 2013.godine, UNDP je izvršio kompletну adaptaciju (građevinsko-zanatske radove) prostorija u ulici Obala Kulina bana broj 4 i kompletno opremanje sa namještajem (radni stolovi, radne fotelje i stolice, ormari, plakari rađeni namjenski za taj prostor), računarima, printerima, skenerima i drugom informatičkom opremom, kao i telefonskom centralom i telefonima. Nadalje, uložena su sredstva za instaliranje i održavanje programa elektronskog vođenja predmeta "OWIS" i troškovi edukacije pravnih zastupnika. Nakon što se u mjesecu junu 2015.godine ukazala potreba iseljenja Zavoda iz prostorija u ulici Obala Kulina bana broj 4 u prostorije "ZOI 84" u ulici Braničeva Sarajeva broj 21, UNDP je ponovo pružio podršku u adaptaciji i opremanju prostorija u ulici Braničeva Sarajeva broj 21 i u kratkom roku izvršenog preseljenja i demontaže dijela namjenski izrađenog namještaja i njegovog prilagođavanja i ugradnje u novim prostorijama. Osim toga u novim prostorijama UNDP je 2017. godine obezbjedio namještaj i računare za dodatnu kadrovsku popunu Zavoda, a bio je potpisani i Memorandum o saradnji kojim je UNDP preuzeo obavezu angažovanja i plaćanja jednog stručnog saradnika na period od 12 mjeseci, a isti nije realizovan iz razloga što su donatori umanjili sredstva za projekat besplatne pravne pomoći.. Saradnja je nastavljena i u 2018.godini kroz organizovanje



trodnevne edukacije za pružaoce besplatne pravne pomoći, kojoj edukaciji su prisustvovali pravni zastupnici Zavoda, a UNDP je snosio sve troškove smještaja i ishrane uz obezbjedenje predavača-edukatora.

Dakle, osnivanje ovog Zavoda prvenstveno je imalo za cilj institucionalno pružanje besplatne pravne pomoći i omogućavanje korisnicima pristup pravdi pred sudom i drugim organima pod jednakim uslovima i bez diskriminacije da ostvare i zaštite svoja prava uz osiguranje primjene najvišeg nivoa međunarodno priznatih prava i sloboda zagarantovanih Evropskom konvencijom o ljudskim pravima i temeljnim slobodama (član 6. Konvencije), a čije je odredbe Bosna i Hercegovina ugradila u Ustav kroz član II, kojim je regulisano da se Konvencije sa svojim protokolima direktno primjenjuje u Bosni i Hercegovini i da ti akti imaju prioritet nad svim ostalim zakonima. Nadalje, treba istaći da se angažovanjem pravnih zastupnika Zavoda, koji su na Listi branitelja u odbranama po službenoj dužnosti u krivičnom i prekršajnom postupku, ostvaruju značajne uštede u Budžetu Kantona Sarajevo. Zavod je počeo sa radom dana 20.06.2013.godine kada su stvoreni uslovi za pružanje besplatne pravne pomoći, tj. od tada je otpočeo kontinuirani rad sa strankama i njihov prijem svakim radnim danom u periodu od 09,00 do 13,00 sati.

II NORMATIVNI DIO

U izvještajnom periodu nije bilo programiranih niti neprogramiranih propisa koje donosi Vlada i Skupština Kantona Sarajevo, a odnose se na oblast pružanja besplatne pravne pomoći.

III TEMATSKI DIO

1. **Program rada Kantonalnog zavoda za pružanje besplatne pravne pomoći za 2018.godinu** donijet je na način i u rokovima koji su propisani Odlukom o metodologiji izrade i donošenja programa rada i izvještaja o radu Vlade Kantona Sarajevo i kantonalnih organa ("Službene novine Kantona Sarajevo", broj: 29/12), te dostavljen Vladi Kantona Sarajevo na usvajanje i isti je uključen u Program rada Vlade Kantona Sarajevo za 2018.godinu, kao i u Program rada Skupštine Kantona Sarajevo u dijelu koji se odnosi na nadležnost Skupštine u oblasti besplatne pravne pomoći.
2. **Izvještaj o radu sa finansijskim izvještajem Kantonalnog zavoda za pružanje besplatne pravne pomoći za 2017.godinu**, u utvrđenim rokovima i na način propisan Odlukom o metodologiji izrade i donošenja programa rada i izvještaja o radu Vlade Kantona Sarajevo i kantonalnih organa ("Službene novine Kantona Sarajevo", broj: 29/12), te u skladu sa odredbom člana 41. stav 2. Zakona o pružanju besplatne pravne pomoći podnijet je Vladi i Skupštini Kantona Sarajevo.
 - a) Nakon razmatranja navedenog izvještaja Vlada Kantona Sarajevo donijela je Zaključak broj: 02-05-28114-5/18 od 19.07.2018.godine, kojim je prihvatila Izvještaj o radu sa finansijskim izvještajem Kantonalnog zavoda za pružanje besplatne pravne pomoći za 2017.godinu. Vlada Kantona Sarajevo formirana nakon izbora održanih u



oktobru 2018.godine, ponovo je razmatrala Izvještaj o radu, pa je Zaključkom broj: 02-05-309-36/19 od 10.01.2019.godine prihvatile Izvještaj o radu sa finansijskim izvještajem Kantonalnog zavoda za pružanje besplatne pravne pomoći za 2017.godinu i isti je dostavila Skupštini Kantona Sarajevo na nadležno odlučivanje.

b) Skupština Kantona Sarajevo Zaključkom broj: 01-05-1904/19 od 25.01.2019.godine nije usvojila Izvještaj o radu sa finansijskim izvještajem Kantonalnog zavoda za pružanje besplatne pravne pomoći za 2017.godinu.

IV KAPITALNI PROJEKTI

Zavod je u izvještajnom periodu izvršio nabavku opreme iz budžetskih sredstava za 2018.godinu u iznosu od 1.449,00 KM.

V OCJENA STANJA POSTIGNUTIH REZULTATA

Zavod je i u 2018.godini, sa nedovoljnom kadrovskom popunjenošću, koja je izražena već više godina, uz kontinuirano povećanje broja korisnika pravne pomoći i broja predmeta u radu, ostvario izuzetno dobre rezultate i ostvario je postavljene ciljeve u 2018.godini. Na nedovoljnu kadrovsku popunjenošću ukazivali smo i u ranijim izvještajima, uz napomenu da je u 2018.godini dodatno smanjen broj uposlenika sa 8 na 7, jer je sa 22.02.2018.godine jedan uposlenik dao otkaz i prestao mu je radni odnos. Kadrovska popunjenošć za 8 uposlenika odobrena je Zaključkom Vlade Kantona Sarajeva od 10.01.2013.godine, odnosno prije samog početka rada Zavoda, te s tim u vezi treba imati u vidu da su dva puta vršene izmjene i dopune Zakona o pružanju besplatne pravne pomoći i predviđene dvije kategorije lica koja pravo na besplatnu pravnu pomoć ostvaruju po samom statusu, čime se povećao i broj korisnika.

Treba istaći da je Zavod već od samog početka svog rada opravdao svoje osnivanje u cilju uspostavljanja djelotvornog i efikasnog sistema besplatne pravne pomoći u Kantunu Sarajevo, koji će biti prepoznat od strane korisnika i koji će im omogućiti bolju informisanost o njihovim pravima i obavezama, zaštitu i ostvarivanje njihovih prava, a sa druge strane kroz podizanje nivoa kvaliteta podnesaka i stručno zastupanje stranaka pred sudom u parničnom i drugim postupcima, **povećat će se i stepen efikasnosti sudova**, što je od strane predsjednice i sudija Općinskog suda u Sarajevu već više puta javno istaknuto. Takođe, kroz angažovanje tri pravna zastupnika u odbranama po službenoj dužnosti u krivičnom i prekršajnom postupku, kao i u predhodnim godinama, ostvarene su značajne uštede u Budžetu Kantona Sarajevo i u 2018. godini one su nešto veće u odnosu na prethodne godine. U 2018.godini broj postavljenja u odbranama po službenoj dužnosti je na nivou iz 2017.godine, s tim da je i u 2018.godini došlo do povećanja broja krivičnih predmeta 97, u 2017.godini taj broj je iznosio 91, a sve to ukazuje na uspješnost pravnih zastupnika kao brantelja u odbranama po službenoj dužnosti, jer je to značajno povećanje u odnosu na 2016.godinu kada je postavljenja bilo u 37 krivičnih predmeta. Rezultati ostvareni u 2018.godini veći su u odnosu na prethodnu godinu po ukupnom broju predmeta u radu (1902 predmeta 2018.godine, 1852 predmeta



2017.godine), a po broju novih korisnika i ukupnom broju pruženih usluga, to je na nivou iz 2017.godine. Imajući u vidu naprijed iznijeto i dostignuti kvalitet rada u predmetima, treba istaći da su ovakvi rezultati ostvareni maksimalnim angažovanjem svih uposlenika Zavoda, uz obavljanje poslova i van radnog vremena, da bi se preduzele sve pravne radnje na vrijeme i u zadatim rokovima, čijim propuštanjem bi nastupile štetne posljedice za korisnike pravne pomoći koje se ne bi mogle ispraviti.

Naime, ovakva ocjena rezultata rada može se dati ako se ima u vidu i činjenica da je Zavod počeo sa radom 20.06.2013.godine, odnosno da je relativno nova institucija i da su uposlenici Zavoda na Listi branilaca u odbranama po službenoj dužnosti od 26.09.2013.godine (kada je donijeto rješenje), kao i da okrivljeni/optuženi imaju pravo da biraju ko će im biti branilac sa liste, na kojoj se osim 3 pravnih zastupnika Zavoda nalaze i 231 advokat Regionalne advokatske komore Sarajevo (što zahtjeva da se uposlenici Zavoda moraju dokazivati svojim radom da bi bili angažovani kao branioci u odbranama po službenoj dužnosti, a taj rad je, po svom kvalitetu i angažovanju pravnih zastupnika, već prepoznat od strane branjenika i suda). Kao pravni zastupnici na pružanju svih oblika besplatne pravne pomoći i u svim postupcima (parnični, vanparnični, izvršni, upravni, krivični, prekršajni i upravni spor) bili su angažovani direktor i četiri uposlenika-državna službenika, što je nedovoljno da bi se ispunile sve potrebe za pružanjem besplatne pravne pomoći u narednom periodu i da bi se zadržao dostignuti kvalitet rada, imajući u vidu iz godine u godinu konstantan porast broja predmeta u radu i broja korisnika, te da bi se ostvarile još veće uštede u Budžetu Kantona Sarajevo, kroz angažovanje pravnih zastupnika Zavoda u odbranama po službenoj dužnosti.

Kao parametre za ocjenu stanja i postignutih rezultata u ovom dijelu izvještaja navest ćemo samo neke, i to kako slijedi:

- u periodu od 01.01.-31.12.2018.godine u Zavodu je registrovano **novih 3611 korisnika**, koji su unijeti u bazu podataka koja se vodi u elektronskoj formi, a kada bi se tom broju dodalo preko 300 e-mailova na koje je odgovoren kroz pružanje općih informacija, broj korisnika besplatne pravne pomoći u 2018.godini iznosio bi oko 4.000.
- u izvještajnom periodu 01.01.-31.12.2018.godine, formirano je i u radu bilo **ukupno 1902** predmeta, što je povećanje u odnosu na 2017. godinu, kada je bilo 1852 predmeta, od čega je riješeno 1682 predmeta, a u 2019.godinu prenijeto je 220 predmeta (broj predmeta po vrsti postupaka, te broj okončanih predmeta sa procentom rješenosti **dat je u tabelarnom prikazu** u dijelu VII-izvršenje kontinuiranih poslova),
- u 2018.godini sud je **donio 168 rješenja** o postavljenju-angažovanju uposlenika Zavoda (većinom pomoćnika direktora za krivični i prekršajni postupak, kao i direktora i stručnog savjetnika- pravnog zastupnika za krivični i prekršajni postupak koji je zbog nedostatka kadra bio angažovan i u drugim postupcima), kao branitelja za odbrane po službenoj dužnosti u krivičnom i prekršajnom postupku, čime su ostvarene uštede u Budžetu Kantona Sarajevo u iznosu od **207.364,00 KM** (ta sredstva bi bila isplaćena advokatima za odbrane po službenoj dužnosti), što predstavlja procent od **58,19% ukupnih budžetskih rashoda** koje je napravio ovaj Zavod u 2018.godini, odnosno **84,02%** rashoda na ekonomskom kodu 611 100- **Bruto plaće i naknade za 8 uposlenika** do 22.02.2018.godine, a od tada pa do 31.12.2018.godine za 7 uposlenika Zavoda. Kod ovih postupaka značajan je procenat rješenosti predmeta (premeta koji su arhivirani) i on kod krivičnih predmeta iznosi **35,98%** dok kod prekršajnih iznosi **56,56%** riješenih predmeta. Kvalitet rada odnosno stručnost i savjesnost u radu branitelja u odbranama po službenoj dužnosti ogleda se kroz podatak da su



- u 2018.godini donijete u **krivičnom** postupku u 3 predmeta **oslobađajuće** presude (dok su 3 predmeta iz ranijih godina nakon žalbi Kantonalnog tužilaštva potvrđene oslobađajuće presude); u **3** predmeta postupak je **prekinut**; **10** predmeta su završena **sporazumom o priznanju krivnje**; u **27** predmeta u odnosu na maloljetna lica donijeta je naredba o nepokretanju pripremnog postupka i samo u **2** predmeta izrečenu su **bezuvjetne kazne zatvora** (u pitanju su lica koja su ranije više puta osuđivana za istovrsna krivična djela). U **prekršajnom** postupku u **9** predmeta donijeta su rješenja o obustavi postupka, tj. o oslobađanju okrivljenih i malodobnih lica od prekršajne odgovornosti. Maksimalni angažman, profesionalnost, stručnost i kvalitet u radu je jedini način na koji pravni zastupnici Zavoda mogu u odbranama po službenoj dužnosti da se "izbore za posao", pa i pored evidentno dobrih rezultata postoji osporavanje njihovog angažovanja i pokušaji da se isključe iz tih postupaka, a što je suprotno Zakonu o krivičnom postupku FBiH i Zakonu o pružanju besplatne pravne pomoći.
- da su u 2018.godini radom uposlenika Zavoda (većim dijelom pomoćnika direktora za parnični i dr. postupke i pravnog zastupnika za tu oblast i u jednom dijelu direktora i pomoćnika direktora za krivični i prekršajni postupak i stručnog savjetnika-pravnog zastupnika za krivični i prekršajni postupak) **u svim drugim postupcima (parnični, vanparnični, izvršni i dr.)** za građane tj. **korisnike** besplatne pravne pomoći preduzete radnje i pruženi različiti oblici pravne pomoći koji se finansijski mogu iskazati u iznosu od **215.911,00 KM**. S tim u vezi treba istaći da je to iznos koji se odnosi na preduzete pravne radnje **gdje su formirani predmeti**, dok za usmene pravne savjete i druge oblike pravne pomoći u naprijed navedenom iznosu nije iskazan takav rad, a takvi oblici ostvarivanja besplatne pravne pomoći su povećani i u 2018. godini, u odnosu na 2017.godinu, kada je to povećanje bilo značajno u odnosu na ranije godine. Prema tome, **rad Zavoda se kroz formirane predmete** iz svih oblasti i postupaka u kojima se pruža besplatna pravna pomoć, može finansijski iskazati **u ukupnom iznosu od 423.275,00 KM**, dok su **ukupni rashodi** ovog Zavoda u 2018.godinu **iznosili 356.340,36 KM**. Takođe i kod ovih postupaka značajan je procent riješenih predmeta, te on kod parničnih predmeta iznosi **80,20%**, kod vanparničnih predmeta **95,10%** i izvršnih predmeta **94,00%**. Profesionalnost, stručnost i savjesnost, te kvalitet rada u ovoj oblasti može se cijeniti kroz podatak da u **parničnim** predmetima u kojima su uposlenici Zavoda podnijeli tužbe i vršili zastupanje korisnika besplatne pravne pomoći, u 2018.godini, kao i ranijih godina, **nije bilo presuda** kojima se odbija tužbeni zahtjev lica koje su zastupali pravni zastupnici. Treba istaći i činjenicu da su i u predmetima gdje nismo zastupali stranke, već su kroz sačinjavanje podnesaka: odgovora na tužbu, podnesaka za pripremno ročište i podnesaka za glavnu raspravu koji sadrže završnu riječ, stranke uspješno okončale postupak da je tužba u odnosu na njih odbijena ili da im je usvojen tužbeni zahtjev kada su kao stranka bili tužitelji. Kao primjer navodimo da je u predmetu tužitelja Mikrokreditne fondacije protiv tužene kojoj je odobrena besplatna pravna pomoć i sačinjen odgovor na tužbu u februaru 2018.godine, kao i podnesak za glavnu raspravu, u 2018.godini donijeta je presuda kojom je Mikrokreditna fondacija odbijena sa tužbenim zahtjevom radi isplate duga od 14.286,96 KM.

S obzirom da u predmetima gdje nismo zastupali stranke, nemamo potpune podatke o ishodu postupka, već samo u situaciji kada se stranke obrate u Zavod i upoznaju nas o ishodu postupka, te za takve predmete ne možemo dati precizne podatke o tome kako su isti završeni. U svih 39 završenih predmeta vanparničnog postupka donijete su odluke kojima je



udovoljeno pokrenutim prijedlozima, dok za predmete upravnog postupka i upravnog spora sačinjavamo razne podneske: zahtjeve, žalbe, tužbe i sl., podatke kako je predmet okončan imamo ukoliko se stranka obrati u Zavod i o tome nas informiše. U vezi sa pokrenutim upravnim sporovima treba imati u vidu činjenicu da se po istim rješava tek po proteku 3 i više godina zbog velikog broja nerješenih predmeta na Kantonalnom suda u Sarajevu. Kao primjer uspješnosti možemo navesti presudu Vrhovnog suda Federacije BiH od 02.08.2018.godine koja je donijeta nakon što je pravni zastupnik Zavoda podnio zahtjev za vanredno preispitivanje sudske odluke-pravosnažne presude Kantonalnog suda u Sarajevu broj: 09 0 U 016635 12 U od 06.10.2015.godine kojem je odbijena tužba tužiteljice protiv prvostepenog rješenja kojim joj je prestalo pravo na ličnu invalidninu I grupe i dodatak za njegu i pomoć od strane drugog lica II grupe sa 30.11.2011.godine. Presudom Vrhovnog suda zahtjev za vanredno preispitivanje sudske odluke se uvažava, presuda Kantonalnog suda u Sarajevu broj: 09 0 U 016635 12 U od 06.10.2015.godine preinačava i rješava: "Tužba se uvažava, te poništava osporeno rješenje tuženog broj: 03-35/4-3632/12-R2-OA od 11.10.2012.godine i prvostepeno rješenje JU Kantonalni centar za socijalni rad Sarajevo-Služba socijalne zaštite Općine Stari Grad broj: 35/I-07-533-859/06-R-R2 od 21.12.2011.godine". S obzirom na ovakav sadržaj presude stranci kojoj je sačinjen zahtjev za preispitivanje sudske odluke vraćena su sva ranije utvrđena prava i iz navedene presude postoji obaveza da joj se isplati cijelokupne naknade po osnovu lične invalidnine i dodatka za njegu i pomoć od strane drugog lica počev od 30.11.2011.godine kada joj je prvostepenim rješenjem utvrđen prestanak prava.

- u 2018.godini ispred Zavoda je predložen državni službenik, kao predstavnik koji je učestvovao u Radnoj grupi, koja je izradila prijedlog Protokola o saradnji i postupanju u slučajevima protivpravnog ponašanja na štetu djece u Kantonu Sarajevo. Navedeni protokol potpisani je dana 02.10.2018.godine, a potpisnici tog sporazuma su: Ministarstvo za rad, socijalnu politiku, raseljena lica i izbjeglice Kantona Sarajevo; Ministarstvo unutrašnjih poslova Kantona Sarajevo; Ministarstvo unutrašnjih poslova-Uprava policije; Ministarstvo zdravstva Kantona Sarajevo; Ministarstvo pravde i uprave Kantona Sarajevo; Ministarstvo za obrazovanje, nauku i mlade Kantona Sarajevo; Kantonalno tužilaštvo Kantona Sarajevo; Kantonalni sud u Sarajevu; Općinski sud u Sarajevu; Kantonalni zavod za pružanje besplatne pravne pomoći ; Javna ustanova "Kantonalni centar za socijalni rad" i Kantonalna javna ustanova "Odgojni centar Kantona Sarajevo".
- U periodu od 02. do 06. jula 2018.godine u okviru Misije strukovne revizije u Bosni i Hercegovini za oblast besplatne pravne pomoći, a u kontekstu pripreme Mišljenja Evropske komisije o zahtjevu za članstvo Bosne i Hercegovine u Evropskoj uniji od strane eksperata iz Holandije i Škotske i predstavnika Evropske komisije radena je procjena nivoa usklađenosti pravnog, strateškog i institucionalnog okvira Bosne i Hercegovine u oblasti besplatne pravne pomoći sa međunarodnim standardima EU i dobrim praksama u državama članicama Evropske unije. U okviru Misije, Zavod u Sarajevu i Zavod u Zenici, odabrani su u okviru Federacije Bosne i Hercegovine radi sagledavanja stanja. S tim u vezi izvršeno je: prevodenje Zakona o pružanju besplatne pravne pomoći Kantona Sarajevo, Pravilnika o unutrašnjoj organizaciji Kantonalnog zavoda za pružanje besplatne pravne pomoći, sačinjen pregled rada Kantonalnog zavoda za pružanje besplatne pravne pomoći za period 2013-2017 sa pregledom statističkih i finansijskih podataka za navedeni period a po podacima kako su traženi i isti prevedeni na engleski jezik kao i dat sadržaj konkretnog predmeta koji



je bio u radu Zavoda-studija slučaja i isti preveden na engleski jezik. Osim naprijed navedenog, nakon što je sve dostavljeno ekspertima, održan je sastanak sa direktorom i pomoćnikom direktora za krivični i prekršajni postupak u trajanju od dva i pol sata na kome su detaljno prezentovani rezultati rada Zavoda, organizacija i sva druga pitanja koja su bila od interesa za prave eksperte koji su trebali sačiniti izvještaj o stanju besplatne pravne pomoći u Bosni i Hercegovini i dati svoje preporuke za uspostavu sistema besplatne pravne pomoći usklađen sa međunarodnim i standardima Evropske unije. Od strane pravnih eksperata i predstavnika Evropske komisije koji su prisustvovali sastanku, pohvaljen je rad Zavoda u Sarajevu i angažman pravnih zastupnika i njihov kvalitet u radu.

- u 2018.godini nastavljena je ranije uspostavljena dobra saradnja sa nevladinim organizacijama registrovanim za pružanje besplatne pravne pomoći i to kako kroz aktivno učešće u radu Mreže pružalaca pravne pomoći u BiH, tako i kroz saradnju sa nekim organizacijama na pojedinačnim, konkretnim projektima. To se prvenstveno odnosi na realizaciju saradnje kroz ranije potpisani **Sporazuma o saradnji** u cilju unaprijeđenja sistema besplatne pravne pomoći u Kantonu Sarajevo, koji su dana 06.11.2014.godine, na inicijativu Fondacije lokalne demokratije i ovog Zavoda potpisali još i Institucija Ombudsmena BiH, Općinski sud u Sarajevu, JU Kantonalni centar za socijalni rad, te Općine Stari Grad Sarajevo, Vogošća, Ilijadža , Ilijaš i Trnovo. Svrha pomenutog sporazuma jeste u uspostavljanju zajedničke saradnje i koordinacije pružalaca besplatne pravne pomoći kako bi građani Kantona Sarajevo imali efikasniju i kvalitetniju zaštitu u ostvarivanju svojih prava.
- u 2018.godini nastavljeno je obavljanje studentske prakse od strane studenata završne godine i Master studija koje odabere Upravni odbor Evropskog udruženja studenata prava Sarajevo "Elsa", a na osnovu Sporazuma o saradnji koji je zaključen dana 23.02.2017.godine. Nakon obavljenе prakse studenti su imali veoma pozitivna iskustva, jer im je omogućeno da prisustvuju pružanju pravne pomoći korisnicima, da pod nadzorom pravnih zastupnika sačinjavaju rješenja o pružanju besplatne pravne pomoći, te različitim podnesaka, kao i tužbi u jednostavnijim slučajevima. Takođe studentima je omogućeno da zajedno sa pravnim zastupnicima Zavoda prisustvuju nekim suđenjima, kako u parničnom tako i u krivičnom postupku, ovisno o njihovom interesovanju.
- U 2018.godini potписан je Memorandum o saradnji povodom projekta "Pravda za svako dijete" sa Centrom za ljudska prava u Mostaru koji pruža tehničku podršku u implementaciji aktivnosti povodom projekta "Pravda za svako dijete" koji organizuje UNICEF u saradnji sa Švedskom agencijom za razvoj (SIDA) i Švicarskom kooperacijom za razvoj (SDC), kojim je omogućeno da polaznici pravne klinike "Pravda za djecu" ispred Pravnog fakulteta Univerziteta u Sarajevu obave praktičnu pravnu obuku u Kantonalnom zavodu za pružanje besplatne pravne pomoći, sa fokusom na pristup pravdi i ostvarivanju i zaštiti prava i interesa djece u raznim pravnim postupcima i oblastima.
- u 2018.godini posvećena je posebna pažnja po pitanju stručnog obrazovanja i usavršavanja svih uposlenika-državnih službenika u Zavodu i to kroz prisustvo na **14** seminara-edukacija i radionica u organizaciji UNDP, UNICEF,NVO "Vaša prava", NVO Analitika, " Privredne štampe" Sarajevo, ADS F BiH, Udruženje sudija- seminar iz građanske oblasti i seminar iz krivčne oblasti. Od edukacija značajno je istaći da su i u 2018. godini nastavljene aktivnosti i organizovani seminari od strane UNICEF i UNDP, kao ranijih godina na temu Prava djeteta kroz projekat "Pravda za svako dijete", kao i edukacije koje je organizovala Agencija



za državnu službu Federacije Bosne i Hercegovine i sve te edukacije nisu iziskivale nikakve troškove budžetskih sredstava, osim troškova kotizacije za seminare koje je organizovala "Privredna štampa" kao i troškove prisustva seminaru iz građanske oblasti i krivične oblasti u organizaciji Udruženja sudija F BiH i Udruženja sudija RS-a.

Preostali i detaljniji podaci o postignutim rezultatima u radu ovog Zavoda dati su u dijelu izvještaja VII-izvršenje kontinuiranih poslova.

Što se tiče opremljenosti sa materijalno-tehničkim sredstvima, za trenutno popunjene kadrove, u cijelosti je ispunjen putem donacije od strane UNDP-a. Po pitanju kadrovske popunjenoosti ista je izvršena sa kvalitetnim i stručnim kadrom koji ima dugogodišnje radno iskustvo i koji ima sklonosti za rad sa kategorijom lica kojima je potrebna pravna pomoć (uslov za prijem je položen pravosudni ispit i tri godine radnog iskustva nakon položenog pravosudnog ispita), ali imajući u vidu sve veći broj korisnika besplatne pravne pomoći, kao i sve veće angažovanje pravnih zastupnika u odbranama po službenoj dužnosti, prvenstveno u krivičnom i parničnom postupku koji su složeniji, te sve veći broj angažovanja pravnih zastupnika radi saslušanja koja se vrše u Policijskim upravama na području Kantona Sarajevo što zahtjeva duže odsustvo pravnih zastupnika iz kancelarije, smatramo da su trenutni kapaciteti nedovoljni da bi se ostvarile značajne uštede u Budžetu Kantona Sarajevo i da bi se ispunile sve potrebe za pružanje besplatne pravne pomoći na način i u obimu kako je to propisano Zakonom o pružanju besplatne pravne pomoći, kao što smo to naveli i u izvještaju za 2017.godinu. S tim u vezi treba istaći da je Zakon o pružanju besplatne pravne pomoći u Kantonu Sarajevo, u poređenju sa istim zakonima u drugim kantonima, utvrdio najširi krug fizičkih lica koja mogu ostvariti pravo na besplatnu pravnu pomoć, kako po samom statusu (devet kategorija korisnika) tako i po osnovu ispunjavanja kriterija lošeg imovinskog stanja.

VI PROGRAMSKA ORJENTACIJA

Da bi se dostigli najviši standardi u pružanju besplatne pravne pomoći i u narednom periodu aktivnosti Zavoda bit će usmjerene na jačanje institucionalnih kapaciteta po pitanju kadrova, organizacije i materijalno-tehničke opremljenosti, a sve u cilju zadržavanja dostaog kvaliteta u radu i njegovog daljeg unaprijeđenja kao i unaprjeđenje kvantiteta i efikasnosti pružene besplatne pravne pomoći licima koja na to imaju pravo u skladu sa Zakonom o pružanju besplatne pravne pomoći, te kroz angažovanje pravnih zastupnika, od strane nadležnih sudova, kao branitelja u odbranama po službenoj dužnosti u krivičnom i prekršajnom postupku i punomoćnika u parničnom postupku, da se ostvare što veće uštede u Budžetu Kantona Sarajevo.

S tim u vezi neophodno je izvršiti popunu upražnjenih radnih mesta i osigurati potrebna minimalna finansijska sredstva na godišnjem nivou za plaćanje zakupnine, komunalnih usluga, el.energije, nabavku materijala, stručne literature, dio sredstava na ime edukacije pravnih zastupnika, kao i jedan dio sredstava na ime troškova vještačenja, za stranke koje nemaju nikakvih mogućnosti da plate te troškove, a bez provođenja takvog dokaza ne može se uspjeti u postupku zaštite i ostvarivanja nekog prava korisnika besplatne pravne pomoći, što bi dovelo do neispunjavanja obaveze utvrđene Zakonom o pružanju besplatne pravne pomoći.



Troškovi vještačenja mogli bi se refundirati tj. vratiti u Budžet nakon okončanog postupka u kome je udovoljeno tužbenom zahtjevu korisnika besplatne pravne pomoći. Takođe, neophodno je obezbjediti sredstva za bruto plaće i naknade za trenutno uposlene kao i za novo upošljavanje uz napomenu da bi novo upošljavanje pravnog zastupnika za krivični i prekršajni postupak povećalo uštede kroz angažovanje u odbranama po službenoj dužnosti, čime bi bili pokriveni troškovi njegovog upošljavanja, a taj iznos bi bio znatno veći od njegovih troškova bruto plate i svih naknada.

U cilju unaprjeđenja kvaliteta i kvantiteta pružanja besplatne pravne pomoći potrebno je osigurati kontinuirano stručno usavršavanje i edukaciju pravnih zastupnika iz oblasti u kojima se pruža besplatna pravna pomoć, kao i obezbjediti potrebnu stručnu literaturu. Tu prvenstveno treba imati u vidu zahtjeve i potrebu pružanja besplatne pravne pomoći nekim novim korisnicima, kao što su žrtve rata sa posebnim akcentom na ostvarivanje prava na naknadu nematerijalne štete za preživjele ratnog seksualnog nasilja u krivičnom postupku ili u parničnom postupku, ako se ne doneše odluka u krivičnom postupku. S obzirom na manja i ograničena sredstva od strane donatora za projekat besplatne pravne pomoći, neophodno je u budžetu predvidjeti veća sredstva za ovu namjenu i ista su za 2018.godinu bila značajno umanjena i nedovoljna da bi se obezbjedilo prisustvo pravnih zastupnika na edukacijama i seminarima koji su do sada prepoznati kao kvalitetni.

U cilju razmjene informacija i prakse u oblasti besplatne pravne pomoći i postizanja viših standarda u pružanju pravne pomoći Zavod će nastaviti uspostavljenu saradnju sa drugim Zavodima za pružanje pravne pomoći i nevladinim organizacijama, kako neposredno, tako i kroz osnovanu Mrežu pružalaca pravne pomoći u BiH, čiji je ovaj Zavod član od 2013.godine, odmah nakon otpočinjanja rada.

U skladu sa potpisanim Sporazumom o saradnji sa Evropskim udruženjem studenata prava Sarajevo "Elsa", Zavod će omogućiti studentima Pravnog fakulteta Sarajevo obavljanje prakse u trajanju od četiri radne sedmice tokom cijele godine, u ovisnosti od njihovog iskazanog interesovanja.

Radi ispunjavanja svoje obaveze pružanja kvalitetne i efikasne pravne pomoći i u cilju praćenja prakse primjene zakonskih odredbi u određenim oblastima i analiza potreba građana da svoja prava i obaveze rješavaju uz pružanje besplatne pravne pomoći, Zavod će saradivati sa nadležnim ministarstvima, centrima za socijalni rad i jedinicama lokalne samouprave, koje takođe pružaju jedan vid pravne pomoći građanima Kantona Sarajevo. U cilju uspostave djelotvornog i efikasnog sistema besplatne pravne pomoći u Kantonu Sarajevo, Zavod će nastaviti i uspostavljati nove partnerske odnose i saradnju sa nevladinim organizacijama na području Kantona Sarajevo, koje iskažu interes za saradnju, a prioritet će biti preuzimanje potrebnih aktivnosti na realizaciji potписанog Sporazuma o saradnji od 06.11.2014.godine.

Kroz štampanje brošura od strane NVO i međunarodnih organizacija sa kojima imamo saradnju, informisanjem putem printanih i elektronskih medija, te putem web stranice, Zavod će informisati javnost o ciljevima rada Zavoda, načinu, kriterijima i uslovima za ostvarivanje prava na besplatnu pravnu pomoć, kao i svim drugim pitanjima iz oblasti besplatne pravne pomoći.



VII IZVRŠENJE KONTINUIRANIH POSLOVA

Kao što smo naprijed istakli Zavod je sa **pružanjem** besplatne pravne pomoći počeo od 20.06.2013.godine, u skladu sa Zakonom o pružanju besplatne pravne pomoći korisnicima, koji na to imaju pravo i to u slijedećim postupcima:

- upravni postupak,
- upravni spor,
- parnični postupak,
- vanparnični postupak,
- izvršni postupak,
- prekršajni postupak i
- krivični postupak, u skladu sa Zakonom o krivičnom postupku u F BiH, dok se besplatna pravna pomoć **ne pruža** u sljedećim postupcima:
 - postupak pred privrednim odjeljenjima nadležnih sudova,
 - postupak upisa u registar privrednih subjekata,
 - postupak registracije obrtničke djelatnosti,
 - postupak registracije udruženja ili fondacije,
 - postupak pred nadležnim poreznim organima i
 - sastavljanje privatnih isprava i ugovora.

U skladu sa Zakonom o pružanju besplatne pravne pomoći, te u obavljanju poslova iz djelokruga rada Zavoda, kao kontinuirani poslove koji su realizovani u 2018.godini i na osnovu kojih se može cijeniti ukupan rad Zavoda, mogu se izdvojiti slijedeći:

1. **Poslovi odobravanja besplatne pravne pomoći**, što obuhvata odlučivanje po zahtjevima za odobravanje besplatne pravne pomoći u postupku i rokovima regulisanim Zakonom o pružanju besplatne pravne pomoći, **te je u periodu od 01.01. do 31.12.2018.godine** donijeto ukupno **942 rješenje** i u svim predmetima, odnosno po podnesenim zahtjevima je odobreno pružanje besplatne pravne pomoći.
2. **Poslovi pružanja općih informacija o pravima i obavezama, pomoć pri popunjavanju obrazaca za ostvarivanja prava na besplatnu pravnu pomoć i davanje pravnih savjeta**, što u skladu sa Zakonom o pružanju besplatne pravne pomoći podrazumjeva da se svim licima bez obzira na ispunjavanje uslova propisanih tim Zakonom pružaju opće informacije o pravima i obavezama kao i pomoć pri popunjavanju obrazaca, dok se pravni savjeti daju licima koja ispunjavaju uslove za ostvarivanje prava na besplatnu pravnu pomoć, te je u izvještajnom periodu bilo novih **3611 stranaka** a u **4219 slučajeva** date su opće informacije o pravima i obavezama, pružena pomoć u popunjavanju obrazaca za ostvarivanje prava na besplatnu pravnu pomoć i dati usmeni pravni savjeti, što je za 33 slučaja više u odnosu na 2017.godinu, a za 380 slučajeva više u odnosu na 2016. godinu i za 1605 više u odnosu na 2015.godinu.



3. Poslovi pružanja pravne pomoći pri sastavljanju svih vrsta pismena u parničnom, vanparničnom, izvršnom, upravnom, krivičnom i prekršajnom postupku i u upravnom sporu, što u skladu sa Zakonom o pružanju besplatne pravne pomoći obuhvata pružanje pravne pomoći pri sastavljanju svih vrsta pismena (tužbe, žalbe, prijedlozi, odgovori na tužbe, prigovori i dr.) i učestvovanje pravnih zastupnika Zavoda u svim fazama parničnog, vanparničnog, izvršnog, upravnog, krivičnog i prekršajnog postupka i u upravnom sporu, te je u izvještajnom periodu u radu bilo ukupno **1902 predmeta, što je povećanje u odnosu na 2017.godinu kada je u radu bilo 1852 predmeta, a njihov broj po vrsti postupaka, sa brojem riješenih predmeta i brojem predmeta u radu, te postotkom riješenosti predmeta kao i strukturu korisnika besplatne pravne pomoći po polu i starosti, vidljiv je iz sljedeće tabele:**

VRSTA POSTUPKA	BROJ PRED. PRENJETIH IZ 2017	BROJ PRED. ZADUŽENIH U 2018	UKUPAN BROJ PREDMETA	POL STRANKE		STAROSNA DOB		BROJ ZAVRŠENIH PREDMETA	BROJ PREDMETA U RADU	POSTOTAK RJEŠENOSTI
				M	Ž	P	M			
PARNIČNI POSTUPAK	24	163	187	59	128	164	23	150	37	80,20%
VANPARNIČNI POSTUPAK	3	38	41	9	32	36	5	39	2	95,10%
IZVRŠNI POSTUPAK	6	44	50	26	24	24	26	47	3	94,00%
UPRAVNI POSTUPAK	4	107	111	62	49	104	7	107	4	96,40%
UPRAVNI SPOR	0	22	22	17	5	22	0	22	0	100,00%
PREKRŠAJNI POSTUPAK	42	80	122	93	29	23	99	69	53	56,56%
KRIVIČNI POSTUPAK	78	111	189	163	26	136	53	68	121	35,98%
UPR.POS. PO ZAH. ZA PRUŽANJE BPP	0	942	942	495	447	848	94	942	0	100,00%
OSTALO OPŠTI UPISN.PRED.	0	238	238					238	0	100,00%
UKUPNO	157	1745	1902	924	740	1357	307	1682	220	88,43%

Kao što se vidi iz naprijed date tabele Zavod je u 2018.godini pružao besplatnu pravnu pomoć iz svih oblasti prava, a u okviru **parničnog postupka** najveći broj predmeta se odnosi na **porodično pravo-132** i to:

- razvod braka sa uređenjem prava u odnosu na djecu i izdržavanje..... 79
- razvod braka sa mjerom osiguranja za plaćanje alimentacije za djecu i supružničko izdržavanje..... 4
- utvrđivanje i podjela bračne stečevine..... 8



• utvrđivanje očinstva i izdržavanje.....	5
• ukidanje izdržavanja za punoljetnu djecu koja nisu na školovanju.....	2
• osporavanje očinstva.....	3
• raskid ugovora o doživotnom izdržavanju.....	1
• izmjena presude u pogledu odluke o izdržavanju.....	5
• povjeravanje i izdržavanje mldb djece iz vanbračne zajednice.....	12
• izdržavanje supružnika nakon razvoda braka.....	5
• izmjena odluke o povjeravanju mldb djeteta.....	8

U odnosu na rješenost gore navedenih predmeta ističemo da su postupci po tužbama za razvod braka u najvećem broju okončani, a prvenstveno kada se postupak razvoda braka provodio po prijedlogu za sporazumno razvod braka u kojim predmetima su pravni zastupnici samo sačinjavali prijedloge kao i u slučaju da razvod braka se provodi u situaciji kada nema zajedničke djece ili su djeca punoljetna. Najveći broj predmeta odnosi se na razvode braka sa mldb djecom, a u manjem broju slučajeva se radi o razvodu braka bez djece ili o situaciji kada su djeca punoljetna i ne nalaze se na redovnom školovanju.

Od predmeta razvoda braka prenesenih iz predhodnih godina treba istaći da su u 2018.godini u 6 slučajeva potvrđene presude od strane Kantonalnog suda Sarajevo u korist stranaka koje su zastupali pravni zastupnici Zavoda, a žalbe su bile izjavljene na dio presude u pogledu visine izdržavanja i povjeravanja djece. Iz 2015 godine 1 predmet je kao specifičan okončan u 2018.godini a specifičan je iz razloga što su djeca povjerena nani na brigu i odgoj uz obavezu roditelja da doprinose izdržavanju djeteta, iz razloga što su prema mišljenju Centra za socijalni rad oba roditelja nepodobna da vrše roditeljsko staranje. U 2 predmeta iz ranijih godina tužbe za supružničko izdržavanje koje su zastupali pravni zastupnici, donijete su prvostepene presude ali su tuženi izjavili žalbe koje su u 2018.godini od strane Kantonalnog suda u Sarajevu odbijene i potvrđene prvostepene presude u korist tužiteljica koje je zastupao Zavod. Nakon pravomoćnosti presude u jednom predmetu pokrenut je izvršni postupak, a u drugom predmetu stranka je ostvarila pravo da u skladu sa Zakonom o PIO "naslijedi" penziju u određenom procentu (koji je veći od dosuđenog izdržavanja). Naime, u ovom predmetu obveznik izdržavanja je u međuvremenu umro a imajući u vidu pravomoćnost presudom utvrđenu obavezu izdržavanja, to joj je i pripalo pravo u skladu sa Zakonom o PIO. U slučaju da da nije bila utvrđena obaveza izdržavanja od strane razvedenog supružnika, stranka ne bi imala to pravo po Zakonu o PIO.

Iz porodičnih odnosa u radu je bilo 12 predmeta povjeravanja i izdržavanja djece iz vanbračne zajednice, a što je za ove predmete specifično u 2 predmeta su predložene mjere osiguranja u pogledu viđanja djeteta. Od toga 3 su predmeta okončana u 2018.godini u korist stranaka koje su zastupali pravni zastupnici Zavoda, dok je u 5 predmeta sačinjena tužba i stranke uz pravno savjetovanje pravnih zastupnika i eventualno sačinjavanje podnesaka za usmene rasprave, same učestvuju u parničnom postupku.

U 3 predmeta razvoda braka su, zbog izbjegavanja roditelja koji je tužen da uopšte doprinosi izdržavanju malodobne djece, po privremenoj mjeri, odnosno mjeri osiguranja koju je podnio pravni zastupnik Zavoda, utvrđena takva obaveza sa određenim iznosom koji će vrijediti i tuženi dužan plaćati, do donošenja pravomoćne presude.U 1 predmetu radilo se o djetetu starom 9 mjeseci koje boluje sa dijagnozom epilepsija. Zbog izuzetno teške finansijske situacije stranaka u predmetima iz porodične oblasti u 63 predmeta uz tužbu su sačinjeni i zahtjevi za oslobođanje od plaćanja sudske takse.



U preostalim predmetima iz porodičnog prava riješenost predmeta je manja u odnosu na predmete razvoda braka iz razloga što je u ovim postupcima potrebno provesti više dokaza i održati više ročišta. Naime, u postupcima utvrđivanja i osporavanja očinstva, utvrđivanje i podjele bračne stečevine, povjeravanje i izdržavanje malodobne djece iz vanbračne zajednice, u kojim postupcima je Zavod pružio pravnu pomoć osim sastava tužbe i u zastupanju stranaka pred sudom, a u tim postupcima koji su najsloženiji potrebno je provesti i dokaze putem vještačenja (DNK analiza) ili vještačenja po vještacima građevinske i geodetske struke u postupcima utvrđivanjima i podjele bračne stečevine. U svim naprijed navedenim predmetima u kojima je Zavod zastupao stranke pred sudom predmeti su okončani u korist zastupanih stranaka. Kao specifično, u cilju zaštite interesa stranaka, u 4 predmeta podjele bračne stečevine pravni zastupnici Zavoda, kao punomoćnici stranaka zatražili su donošenje privremenih mjera i mjera osiguranja u odnosu na suprotnu stranku i iste su odobrene, a u drugim predmetima ako je upis prava u zemljišnim knjigama samo na suprotnu stranku, zatražena je zabilježba spora u zemljišnim knjigama, a sve u cilju zaštite interesa stranaka koje zastupaju pravni zastupnici Zavoda. U 2018.godini formirana su 4 predmeta utvrđivanja očinstva, od čega su sačinjene 3 tužbe sa uputama o daljem postupanju i sačinjavanju podnesaka za ročišta, a u 1 predmetu sačinjen je odgovor na tužbu koja se odnosi na utvrđivanje očinstva. U jednom predmetu utvrđivanja očinstva, iz 2016.godine odobrena je pravna pomoć sastava tužbe i zastupanje, a kako se radi o državljaninu Crne Gore, putem međunarodne pravne pomoći pribavljenja je njegova adresa i pokušana dostava tužbe ali je tužba vraćena iz razloga što je dostava bila neuredna odnosno tuženi izbjegava prijem iste, te je ponovo urgirano kod suda da se dostava tužbe izvrši putem sudskega dostavljača u Crnoj Gori i tada je, u 2018.godini tužba uručena i zakazano je pripremno ročište za mart 2019.godine.

U 2018.godini u radu je bilo ukupno 8 predmeta koja se odnosila na izmjenu odluke o povjeravanju djeteta i visini dosuđenog izdržavanja, zbog promjenjenih okolnosti. U 1 predmetu sačinjena je tužba za izmjenu odluke o povjeri djece i visini izdržavanja i odobreno zastupanje tužitelja, te se čeka zakazivanje pripremnog ročišta. U konkretnom slučaku, ranijom odlukom djeca su povjerena majci na odgoj i vaspitanje ali djeca ne žele da idu kod majke i cijelo vrijeme žive sa ocem koji ih i izdržava a sa navedene adrese idu u školu, a majka se udala. U 1 predmetu odobrena je pravna pomoć za sastav tužbe i zastupanje za ukidanje odluke o dosudi izdržavanja nakon razvoda braka, a kako se radi o licu koje je postalo punoljetno i stupilo u brak, to ne postoje uslovi za dalje primanje izdržavanja. U 3 slučaja sačinjene su tužbe za ukidanje odluke o dosudi izdržavanja nakon razvoda braka, bez odobrenog zastupanja od strane pravnog zastupnika, ali je predhodno, prije sačinjavanja tužbe, prikupljena sva neophodna dokumentacija i strankama date dalje upute za postupanje u toku postupka.

U okviru **parničnog postupka** broj radnih sporova u 2018.godini je u radu bilo ukupno 11 predmeta a isti su se odnosili na otkaz ugovora o radu, naknadu neisplaćenih plaća i neuplaćenih doprinosa, otpremnine, toplog obroka i regresa. Od naprijed navedenih predmeta značajno je istaći da su u 4 predmeta, gdje su upućene opomene pred tužbu radi naplate potraživanja iz radnih odnosa (naknade plate, toplog obroka, otpremnine i doprinosi za PIO), budući da poslodavci dobrovoljno nisu izmirili dugovanja, sačinjene su tužbe u sva četiri predmeta, uz napomenu da su 3 predmeta prenesena iz ranijih godina. U jednom predmetu, koji se odnosi na isplatu otpremnine i doprinosa za PIO u cilju povezivanja radnog staža radi odlaska zaposlenika u penziju, u 2017.godini donesena je presuda u korist tužiteljice koju zastupa ovaj Zavod a na istu je tuženi izjavio žalbu po kojoj nije odlučeno u 2018.godini. U postupcima iz radnih odnosa za uspješno okončanje postupaka problem predstavljaju privredna društva-poslodavci koji su nepoznati na adresi iz sudskeg registra, kao i privredna društva čiji su računi blokirani, a nemaju imovine na kojima bi se moglo provesti prinudno



izvršenje, tako da u nekom situacijama radnici i pored pravomoćnih presuda ne mogu ostvariti svoja prava. S tim u vezi najveći problem se javlja što ostaju sa neuvezanim radnim stažom.

Treba istaći da je i u ovim postupcima, ukoliko tuženi ospori visinu duga, bilo potrebno provesti vještačenje po vještak finansijske struke, da bi se utvrdila visina potraživanja za stranku koju je Zavod zastupao, a te troškove su snosile stranke.

U okviru parničnog postupka i u 2018.godini iz stambene oblasti prenjet je iz 2017.godine jedan predmet tužbe za utvrđivanje statusa stanarsko pravo prije 06.12.2000.godine po Zakonu o stambenim odnosima, sa pravom na otkup stana, i isti je okončan u korist stranke koju smo zastupali. U ovom predmetu stranka je bila dugogodišnji korisnik stana (još od prije rata) a da to pravo korištenja nije bilo pravno regulisano, te je imao status bespravnog korisnika. Primjenom odredaba člana 30. Zakona o stambenim odnosima donesena je presude kojom je tužitelju utvrđeno stanarsko pravo i na osnovu navedene presude stan je evidentiran u Kantonalnom stambenom fondu, a na osnovu presude stranka je izvršila otkup stana po Zakonu o prodaji stanova na kojima postoji stanarsko pravo. U svim ovakvim predmetima osim sastava tužbe pravni zastupnici su vršili i zastupanje stranaka, a zbog složenosti predmeta održano je više ročišta, te su provedeni dokazi vještačenja po vještak građevinske struke na okolnost da se radi o prostorijama koja imaju status stana i veličine pojedinih prostorija. Ovakva vještačenja bilo je potrebno provesti u slučaju da prostorije koje je koristila stranka koju zastupamo, nisu bile evidentirane kao stan u Kantonalnom stambenom fondu. U 1 predmetu iz 2017.godine iz stambene oblasti stranka se obratila za sačinjavanje odgovora na tužbu kojom je traženo njen iseljenje iz stana. Nakon što su od strane pravnog zastupnika Zavoda prikupljeni brojni podaci i dokazi o činjenicama da se tužitelj nezakonito uknjižio na stanu u državnoj svojini kao vlasnik stana, a nakon izvršene privatizacije u kojoj su stanovi bili izuzeti iz procesa privatizacije, kao i podataka da je raskinut ugovor o privatizaciji navedenog preduzeća, koje je imalo pravo na raspolažanje na predmetnom stanu do privatizacije, sačinjen je odgovor na tužbu sa svim dokazima koji su pribavljeni od strane Kantonalne agencije za privatizaciju i Općinskog suda Sarajevo, a za glavnu raspravu sačinjen je podnesak sa završnom riječi i taj predmet je povoljno riješen za stranku koja nam se obratila za pružanje besplatne pravne pomoći, jer je sud odbio tužbeni zahtjev tužitelja zanjeno iseljenje. O saznanjima u pogledu neovlaštenog raspolažanja sa stonom, obavješteni su Agencijaza privatizaciju i druge nadležne institucije.Po izjavljenoj žalbi od strane tužitelja nije odlučeno u 2018.godini. Takođe u 1 predmetu iseljenja po tužbi Općine Centar Sarajevo kao vlasnika stana, traženo je iseljenje u skladu sa odredbama Zakona o stvarnim pravima. U navedenom predmetu pored sastava odgovora na tužbu, odobrena je pravna pomoć zastupanja, jer se radi o specifičnoj situaciji, licima slabog imovnog stanja, licima sa invaliditetom i korisnicima stalne novčane pomoći. Provedeno je pripremno ročište i zakazano ročište za glavnu raspravu u 2019.godini. S obzirom da se radi o porodici koja je korisnik stalne novčane pomoći i licima sa invaliditetom, od strane pravnog zastupnika sačinjen je zahtjev za dodjelu stana koji koriste kao i zahtjev prema Općini Novo Sarajevo na čijoj teritoriji su navedena lica prijavljena, kao i Centru za socijalni rad kako bi se navedenoj porodici pomoglo u rješavanju stambenog pitanja odnosno njihovog smještaja u slučaju iseljenja.

U okviru parničnog postupka iz **obligacionih odnosa** u 2018.godini u radu je bio ukupno 7 predmeta. U jednom predmetu sačinjena je opomena pred tužbu radi naplate regresnog potraživanja potom u 5 predmeta sačinjeni su odgovori na tužbu kojima su stranke tužene zbog neplaćanja naknade za potrošene telefonske usluge i na ime održavanja zajedničkih prostorija, a u 1 predmetu odobrena je pravna pomoć sačinjavanja podneska i zastupanja radi poništenja ugovora o kupoprodaji stana na kojem je stečeno stanarsko pravo. Naime, stranka je imala pravni interes da



kao umješač stupi u parnicu koja se vodi povodom poništenja ugovora o kupoprodaji stana na kojem je on stekao stanarsko pravo prije rata, izvršio povrat navedenog stana i u posjedu istog je od 2004.godine, ali je 1999. godine treće lice zaključilo ugovor o kupoprodaji tog istog stana

U okviru parničnog postupka iz oblasti **stvarnog prava** kao specifični predmeti mogu se istaći dva predmeta u kojima su sačinjene tužbe i zastupaju se malodobna lica radi ulaska u posjed stana čiji su vlasnici, po osnovu nasljeđa iza umrlog oca. U 2017.godini sud je donio presudu kojom je usvojen tužbeni zahtjev u korist mldn djece, a po izjavljenoj žalbi nije odlučeno u 2018.godini.

U okviru **vanparničnog postupka** u radu je bilo ukupno 41 predmet i predmeti se uglavnom odnose na: pokretanje prijedloga za oduzimanje poslovne sposobnosti-5 predmeta; prijedloga za ispravku pogrešno upisanog prezimena i imena u zemljišnim knjigama kako bi se mogli provesti ostavinski postupci – 6 predmeta; postupci dokazivanja smrti proglašenjem nestalog lica umrlim-6 predmeta; predmeti koji se odnose na sastavljanje prijedloga zemljišnoknjižnom uredu za zabilježbu spora-5 predmeta; prijedloga za donošenje dopunskog rješenja u ostavinskom postupku u vezi naknadno pronađene imovine-7 predmeta, 3 prijedlog za dokazivanje stečene stručne spreme i 1 prijedlog za sačinjavanje sudskog testamenta, 4 predmeta brisanje tereta upisanih u ZK, 4 predmeta se odnose na sastav prijedloga za izdavanje saglasnosti za zaključenje braka malodobnim licima. Od ovih 41 predmeta u radu u 2018.godini okončano je 39 predmeta i svi su riješeni u korist stranke.

U okviru **izvršnog postupka** u radu je bilo ukupno 50 predmeta, a najveći broj predmeta odnosi se na sastav prijedloga za izvršenje: radi naplate dospjelog a nenaplaćenog iznosa na ime izdržavanja malodobne djece-25 predmeta; radi naplate dosuđenog supružanskog izdržavanja-5 predmeta; radi naplate potraživanja iz radnog odnosa-7 predmeta, a kao predmet izvršenja označeni su plaće izvršenika, penzije izvršenika, prodaja nekretnine i naplata potraživanja popisom i prodajom pokretnih stvari kao i prodajom motornog vozila. U okviru izvršnog postupka formirano je 13 predmeta koji se odnose na sastav prigovora na rješenje o izvršenju radi naplate potraživanja, a najčešće komunalnih usluga.Takođe u izvršnom postupku za korisnike besplatne pravne pomoći sačinjavani su podnesci kojima je u izvršnom postupku predlagana promjena predmeta i sredstva izvršenja, a nakon što izvršenje nije moglo biti provedeno na ranije označenom predmetu, te su u takvim postupcima pribavljeni podaci o nadležnih organa o novčanim primanjima ili imovini sa kojom raspolažu izvršenici, a u četiri predmeta iz ranijih godina zbog blokade računa i neposjedovanja imovine (pokretnih i nepokretnih stvari) privrednih društava nisu okončani postupci prinudnim putem.

Postupci pred organima uprave i u radu je bilo 111 predmeta a isti su se najčešće odnosili na sačinjavanje podnesaka (molbe, zahtjevi, žalbe) **radi ostvarivanja i zaštite socijalnih prava** (žalbe na Nalaz i mišljenje Instituta za medicinsko vještačenje i žalbe na rješenje Službe socijalne zaštite u pogledu visine utvrđenog invaliditeta po Zakonu o zaštiti civilnih žrtava rata i zaštiti porodice sa djecom, zahtjevi i zaštita prava na stalnu i jednokratnu novčanu pomoć, prava na ortopedski dodatak, pravo na tuđu njegu i pomoć, ostvarivanje prava na javnu kuhinji i dr.), **prava iz penzijsko-invalidskog osiguranja** (žalbe na rješenje Federalnog zavoda PIO/MIO Mostar kojim nije priznato pravo iz osiguranja: pravo na starosnu i invalidsku penziju, kao i zahtjevi Federalnom zavodu PIO/MIO u pogledu ograničavanja provođenja rješenja u izvršenju shodno odredbama Zakona o izvršnom postupku) i **rješavanja stambenih pitanja** (zahtjevi prema nadležnim općinama za dodjelu stanova na privremeno i trajno korištenje onim NSP čiji su stanovi u objektima koji su proglašeni ruševnim, te predmeti u kojim su izjavljene žalbe na rješenje Uprave za stambena pitanja u postupku povrata stana ranijih NSP kao i predmeti izjavljivanja prigovora i žalbi na rješenje u odbijanju zahtjeva za dodjelu stana RVI i porodicama šehida/poginulih boraca).



Iz predmeta vođenih u upravnom postupku u 2018. godini u Zavodu je formirano 22 predmeta, gdje je tražena sudska zaštita pokretanjem **upravnog spora**. Pokrenute tužbe odnosile su se na poništenje: rješenja kojim je ukinuto pravo na ličnu invalidninu odnosno kojim je smanjen procent invalidnosti; rješenja donijetih u postupku kontrole zakonitosti korištenja prava na invalidninu; rješenje kojim se odbija prigovor na rješenje a po zahtjevu za dodjelu stana u vlasništvo; rješenja kojim se odbija žalba u postupku legalizacije izvedenih radova; rješenja Federalnog zavoda PIO zbog nepriznavanja prava iz osiguranja-invalidske penzije. U okviru upravnih predmeta u 2 slučaja-predmeta upućen je zahtjev Ministarstvu pravde BiH za dostavu zamolnice nadležnim organima Crne Gore i Srbije za dostavu adrese prebivališta lica koja su tužena odnosno prema kome treba sačinjiti tužbu, a u skladu sa potpisanim Memorandumom i ugovorima sa navedenim državama. Naime, radi sačinjavanja tužbe i dostavljanja tužbe tuženom, neophodno je pribaviti adresu za imenovane koji su strani državljeni i nemaju prijavljen boravak na teritoriji Bosne i Hercegovine.

Pravni zastupnici Zavoda su pružali pravnu pomoć u svojstvu branitelja u **krivičnom postupku** u 145 predmeta, a optužbe su se odnosile na krivična djela:

• teška krađa.....	13
• krađa.....	9
• razbojništvo.....	10
• razbojnička krađa.....	2
• teška tjelesna povreda	12
• laka tjelesna povreda	19
• napad na službenu osobu.....	3
• pomoć učinitelju poslije izvršenog krivičnog djela.....	1
• šumska krađa	3
• skidanje i povreda službenog pečata ili znaka.....	1
• oštećenje tuđe stvari	8
• utaja.....	3
• izbjegavanje izdržavanja.....	1
• obmana pri dobijanju kredita ili drugih pogodnosti.....	4
• pravara u službi i lažno prijavljivanje.....	1
• učestvovanje u tući.....	2
• posjedovanje i omogućivanje uživanja opojnih droga.....	12
• neovlaštena proizvodnja i stavljanje u promet opojnih droga.....	5
• nasilničko ponašanje	22
• nasilje u porodici	12
• teška k.d. protiv opće sigurnosti ljudi i imovine.....	1
• ugrožavanje sigurnosti.....	12
• teško djelo protiv bezbjednosti javnog saobraćaja.....	2
• prevara.....	12
• krivično djelo iz člana 52. ZONDINOM-a.....	3
• paljevina.....	1



• pronevjera u službi.....	2
• krivotvorene isprave.....	2
• narušavanje nepovredivosti doma.....	2
• izazivanje opće opasnosti.....	4
• bludne radnje.....	1
• zapuštanje ili zlostavljenja djeteta ili maloljetnika.....	1
• povreda mira pokojnika.....	1
• spolni odnošaj sa djetetom.....	1
•	

U **prekršajnom postupku** pravni zastupnici su angažovani kao branitelji u 158 predmeta, od čega su 134 predmeta u odnosu na maloljetne osobe, a struktura prekršaja je sljedeća:

• prekršaj iz Zakona o prekršajima protiv javnog reda i mira.....	78
• prekršaj iz Zakona o osnovama bezbjednosti saobraćaja na putevima u BiH....	30
• prekršaji iz Zakona o nabavljanju, držanju i nošenju oružja i municije.....	9
• prekršaj iz Zakona o sprečavanju nasilja i nedoličnog ponašanja	2
• prekršaji iz Zakona o šumama.....	1
• prekršaj iz Zakona o zaštiti nasilja u porodici.....	1

4. **Poslovi odbrane i zastupanja u krivičnom i prekršajnom postupku**, što u skladu sa Zakonom o pružanju besplatne pravne pomoći podrazumjeva da pravni zastupnici Zavoda preduzimaju radnje i učestvuju u svim fazama krivičnog i prekršajnog postupka i vrše stručne poslove koji se odnose na odbranu i zastupanja u krivičnom i prekršajnom postupku i to nakon angažovanja u odbranama po službenoj dužnosti ili po zahtjevu lica koje ima pravo na besplatnu pravnu pomoć u skladu sa Zakonom o pružanju besplatne pravne pomoći. Ti poslovi obuhvataju uvid u spis, razgledanje i fotokopiranje dokaza u tužilaštvu, prikupljanje informacija od strane optuženog a u cilju pripreme koncepta i strategije odbrane, prikupljanje bitnih podataka i dokaza koji će se predložiti u fazi odbrane optuženog na pretresu, posjeta optuženih u pritvoru u cilju pripreme odbrane, učestvovanje na pretresima u svojstvu branitelja optuženog, razmatranje mogućnosti zaključenja sporazuma o krivini i dostavljanje istog nadležnom tužilaštvu, istraživanje svih činjenica koje mogu biti od uticaja na odbranu optuženog, sačinjavanje podnesaka prema nadležnim institucijama u fazi pripreme odbrane, izjavljivanje žalbi na odluke suda i sve druge radnje koje je potrebno preduzeti da bi se stručno i savjesno izvršili poslovi branitelja u krivičnom i prekršajnom postupku. Uposlenici Zavoda nalaze se na Listi branilaca po službenoj dužnosti od 26.9.2013. godine nakon donijetog rješenja od strane Ministarstva pravde i uprave Kanrona Sarajevo te je od strane suda u periodu od 01.01. do 31.12.2018. godine donijeto 168 rješenja o postavljenju i pravni zastupnici Zavoda angažovani kao branioci po službenoj dužnosti u **168 predmeta (od toga 97 krivičnih i 71 prekršajnih)**, a u radu sa predmetima iz predhodne godine **ukupno je bilo 311 predmeta** od čega 189 krivični predmet i 122 predmeta iz prekršaja, iz čega se može zaključiti da je došlo do povećanja broja predmeta iz krivične oblasti, a smanjenja broja prekršajnih predmeta.



U radu Zavoda značajno je istaći da je po osnovu angažovanja pravnih zastupnika Zavoda kao branilaca po službenoj dužnosti u periodu 01.01. do 31.12.2018.godine ostvarena ušteda u Budžetu Kantona Sarajevo u iznosu od 207.364,00 KM (tj. ta sredstva bi bila isplaćena advokatima za odbrane po službenoj dužnosti). Navedeni iznos predstavlja **procenat od 58,19% ukupnih budžetskih rashoda** koje je napravio ovaj Zavod u 2018.godini, odnosno 84,02% rashoda na ekonomskom kodu 611 100 bruto plaće i naknade za 8 uposlenika do 22.02.2018.godine a od tada 7 uposlenika Zavoda. S tim u vezi ukazujemo da je na tim poslovima-odbranama po službenoj dužnosti većim dijelom bio angažovan pomoćnik direktora za krivični i prekršajni postupak te direktor i stručni savjetnik-pravni zastupnik za krivični i prekršajni postupak. Nadalje, ističemo da je od **68 završenih krivičnih** predmeta u 2018.godini donijete **3 oslobođajuće presude** dok su u 3 predmeta donijete odluke o prekidu postupka, 10 predmeta su završena sporazumom o priznanju krivnje a samo u 2 predmeta izrečene su zatvorske kazne i to licima koja su višestruki povratnici u vršenju krivičnih djela. Što se tiče malodobnih počinitelja krivičnih djela, nije bilo izrečenih kazni maloljetničkog zatvora i u svim slučajevima su izrečene odgojne mjere i odgojne preporuke, koje imaju svrhu da se ne pokreće krivični postupak spram maloljetnika, da se utiče na pravilan razvoj maloljetnika i na jačanje njegove lične odgovornosti kako ubuduće ne bi činio krivična djela. U 27 predmeta u odnosu na maloljetna lica donijeta je od strane tužilaštva naredba o nepokretanju pripremnog postupka i samo u jednom predmetu donijeta je sudska odluka i izrečena je odgojna mjera mldb licu pojačan nadzor organa socijalnog staranja. Pravni zastupnici u ulozi branitelja učestvovali su u svim fazama krivičnog postupka, počev od postupka istrage, prisustva radnjama pretresanja, otvaranja i pregledanja oduzetih predmeta, radnjama prepoznavanja lica i predmeta, prisustva ispitivanju malodobnih lica u pripremnom postupku, ispitivanja osumnjičenog, zastupanja i odbrane na sudu, posjete i komunikacija sa pritvorenim licima tokom boravka u pritvorskim jedinicama, prikupljanja dokaza i predlaganja vještačenja. Radnje koje su pravni zastupnici preuzimali u krivičnim predmetima, između ostalog mogu se sagledati i da su: u 14 predmeta sačinjeni prijedlozi za zaključenje sporazuma o priznanju krivnje sa Kantonalnim tužilaštvom a u 10 predmeta takvi sporazumi su i zaključeni i na taj okončan krivični postupak; u 5 predmeta sačinjeni su odgovori na žalbe koje je izjavilo Kantonalno tužilaštvo, u 10 predmeta sačinjene su žalbe u kojima je rješenjem sudske pojedinca određen pritvor a u jednom predmetu sud je odbio prijedlog za određivanje pritvora na koju odluku se žalilo tužilaštvo i žalba je odbijena, zatim 5 žalbi na odluke krivičnog vjeća o produženju pritvora. Angažovanje pravnih zastupnika u navedenim pritvorskim predmetima, bilo je van redovnog radnog vremena i u neradne dane. Pravni zastupnici Zavoda uložili su 7 žalbi od kojih su 3 usvojene, 2 žalbe su odbijene i po 2 žalbe nije riješeno u 2018.godini. Od usvojenih žalbi treba istaći da su u ponovnom postupku u 2 predmeta gdje su lica koja brane pravni zastupnici Zavoda donijete oslobođajuće presude a nakon uložene žalbe od strane tužilaštva u jednom predmetu donijeta je odluka drugostepenog suda kojom je žalba tužilaštva odbijena i potvrđena prvostepena presuda.

U 3 predmeta sačinjen je prijedlog nadležnom organu/sudu za brisanje ranije izrečenih kazni; u 3 predmeta sačinjene su molbe za odlaganje izvršenja kazne, a u 4 predmeta sačinjeni su prijedlozi za izmjenu načina izdržavanja kazne; u 226 slučajeva su pravni zastupnici uputili različita pismena nadležnim institucijama i organima, MUP KS, PU Centar, Stari Grad, Iličići, Vogošća, Ilijaš, Novi Grad, Novo Sarajevo itd, KCU Sarajevo,



Psihijatrijskoj klinici, Zavodu za alkoholizam i druge toksikomanije radi prikupljanja dokaza i činjenica koje idu u korist branjenicima Kantonalnog zavoda; u 99 navrata su izvršeni uvidi u predmete pred Općinskim sudom u Sarajevu; u 35 navrata su pravni zastupnici bili u posjeti pritvorenicima smještenim u Kazneno popravni zavod Sarajevo, u 97 navrat su se obratili Kantonalnom tužilaštvu Kantona Sarajevo radi pribavljanja dokaza u tekućim predmetima u skladu sa članom 61. Zakona o krivičnom postupku Federacije Bosne i Hercegovine te su isto toliko puta stupili u kontakt sa Kantonalnim tužilaštvom Kantona Sarajevo radi preuzimanja dokaza i u 64 navrata su pravni zastupnici stupili u Policijsku stanicu MUP-a Kantona Sarajevo radi ispitivanja osumnjičenih maloljetnih lica u toku istrage.

Osim predmeta u kojima su pravni zastupnici angažovani kao branitelji, u 63 predmeta strankama je pružena pravna pomoć u postupcima istrage, date pouke o pravima i obavezama kao i pravni savjeti iz oblasti krivičnog i prekršajnog postupka, podnijeti zahtjevi za odlaganje izvršenja izrečene kazne, sačinjavani dopisi i tražene informacije od raznih institucija u sklopu ostvarivanja i zaštite prava okrivljenih i optuženih.

U **prekršajnim** predmetima od 69 završena predmeta u 2018.godini u 9 predmeta donijeto je rješenje o obustavi prekršajnog postupka tj. o oslobađanju okrivljenog ili maloljetnog lica od prekršajne odgovornosti, u 8 predmeta izrečene su uvjetne novčane kazne, u 18 predmeta izrečen je ukor, u 2 predmeta izrečene su novčane kazne i u 32 predmeta izrečene su odgojne mjere. Treba istaći da su to u većini predmeti u kojima su kao okrivljeni bila malodobna lica, i to mlađa malodobna lica uzrasta 14-16 godina prema kojima su, u skladu sa Zakonom o prekršajima, izricane odgojne mjere, kao i starija malodobna lica 16-18 godina, kojima su izricane sankcije. U okviru prekršajnog postupka u 3 predmeta sačinjene su molbe za obustavu postupka uslijed nemogućnosti plaćanja izrečenih kazni, a u 2 predmeta strankama su sačinjeni prijedlozi za povrat u pređašnje stanje, koji su usvojeni.

5. **Poslovi zastupanja i preuzimanja svih drugih pravnih radnji pred sudovima u parničnom, vanparničnom i izvršnom postupku i upravnom sporu, kao i u upravnom postupku pred organima uprave** što u skladu sa Zakonom o pružanju besplatne pravne pomoći obuhvata pružanje pravne pomoći pri sastavljanju svih vrsta pismena (tužbe, žalbe, prijedlozi, odgovori na tužbe i dr.) i učestvovanje pravnih zastupnika Zavoda u svim fazama parničnog, vanparničnog i izvršnog postupka kao i pomoći pri sastavljanju svih vrsta pismena u upravnom postupku (molbe, zahtjevi, žalbe i dr.) i učestvovanje pravnih zastupnika Zavoda kao punomoćenika stranaka u složenijim pravnim situacijama, te je u izvještajnom periodu otvoreno-formirano ukupno **374 novih predmeta**, uz 37 predmeta prenijetih iz ranijih godina što ukupno predstavlja **411** predmeta koji su bili u radu iz ovih oblasti. Takođe iz ovih oblasti pružena su **1718** pismena i usmena pravna savjeta. Takođe rješavajući po zahtjevima za pružanje besplatne pravne pomoći u upravnom postupku u 2018.godini formirano je novih **942** predmeta. S tim u vezi ukazujemo da su u ovoj oblasti odnosno navedenim postupcima bili angažovani pomoćnik direktora za parnični i dr. postupke i jedan pravni zastupnik za tu oblast, kao i novouposleni pravni zastupnik za krivični i prekršajni postupak, dok su u manjem dijelu bili angažovani i direktor, te pomoćnik direktora za krivični i prekršajni postupak. Nadalje, treba istaći i činjenicu da su radom uposlenika Zavoda, u navedenim postupcima, **u 2018.godini za građane** tj. za korisnike besplatne pravne pomoći preduzete radnje i pruženi različiti oblici ostvarivanja besplatne pravne pomoći koji se finansijski mogu iskazati **u iznosu od 215.911,00 KM.**



6. **Poslovi pristupa pravnih zastupnika na ročišta-pretres**, što je u skladu sa Zakonom o pružanju besplatne pravne pomoći i procesnim zakonima, te su u izvještajnom periodu pravni zastupnici **pristupili na 562 ročišta-pretresa pred sudom u svim postupcima** od čega u krivičnom i prekršajnom postupku 498 pretresa, a u drugim postupcima 64 ročišta.
7. **Poslovi pisarnice-prijem i otprema pošte, vođenje upisnika, ažuriranje spisa i njihovo arhiviranje**, što u skladu sa članom 8. Zakona o pružanju besplatne pravne pomoći, Pravilnikom o obrascima, načinu vođenja i sadržaju evidencija o pruženoj pravnoj pomoći i svih propisa kojima se reguliše kancelarijsko poslovanje obuhvata vođenje evidencije u manuelnoj i elektronskoj formi na način i po sadržaju koji je propisan Pravilnikom, a s obzirom da je Zavod samostalna upravna organizacija, organizovano je i obavljanje i svih poslova pisarnice te je u izvještajnom periodu u 10 različitih upisnika ažurno vođena evidencija, kao što je i vođen djelovodni protokol Zavoda, te razni imenici i interne dostavne knjige, personalni dosjeli i drugi administrativno-pravni poslovi. Obaveza vođenja predmeta i evidencija u manuelnoj i elektronskoj formi utvrđena je članom 8. Zakonom o pružanju besplatne pravne pomoći. Vođenje predmeta u elektronskoj formi obezbjeđeno je donacijom od strane UNDP-a instaliranjem programa za elektronsko vođenje predmeta i svih evidencija po pojedinim postupcima kako je obezbjeđeno i u manuelnoj formi. Navedeni program ima značajne mogućnosti i između ostalog omogućava da sve predmete i aktivnosti po istim imamo u elektronskoj formi (nešto slično CMS-u u sudu), te se na taj način vodi ažurna evidencija stranaka, predmeta i aktivnosti po predmetima.
8. **Poslovi planiranja, izrade Budžeta Zavoda, praćenje realizacije i izvršenja Budžeta**, što u skladu sa zakonskim i podzakonskim aktima podrazumjeva prikupljanje i analizu potreba Zavoda za budžetsku godinu, izrada plana finansijskih i materijalnih sredstava za funkcionisanje Zavoda, izrada kvartalnih potreba i očitovanje na izvršenje Budžeta po kvartalnim periodima, te su u izvještajnom periodu podnijeti: zahtjevi za dodjelu budžetskih sredstava za 2019.godinu, kvartalno sačinjeni i dostavljeni operativni planovi za trošenje budžetskih sredstava, kvartalno dostavljeni izvještaji i obrazloženje po ostvarenim rashodima za te periode, kroz aplikaciju e-Budget sačinjen je Dokument okvirnog Budžeta za period 2019-2021, sačinjen zahtjev za preraspodjelu sredstava u Budžetu Kantona Sarajevo za 2018.godinu, sačinjen zahtjev za dodjelu sredstava u Budžetu Kantona Sarajevo za 2019.godinu-Nacrt Budžeta, sačinjeno izjašnjenje na Nalaz Revizora i dostavljanje dokumentacije u postupku revizije, sačinjena je izjava o fiskalnoj odgovornosti i drugi poslovi iz ove oblasti. Javne nabavke u 2018.godini vršili smo dijelom putem Stručne službe za zajedničke poslove Kantona Sarajevo i to nabavku materijala, osiguranje uposlenika i motornog vozila, nabavka i isporuka goriva, nabavka usluga tekućeg održavanja a u preostalom dijelu nabavke su izvršene putem direktnog sporazuma i sve provedene nabavke bile su manje vrijednosti od 1.000,00 KM. S tim u vezi treba imati u vidu da sve pojedinačne pozicije -ekonomski kodovi u ukupnom iznosu su do 6.000,00 KM, pa i nabavka materijala koju smo vršili putem Stručne službe za zajedničke poslove. S obzirom da u Zavodu nema uposlenika sa ekonomskom strukom to je opravdano vršenje nabavke putem navedene službe koja provodeći postupke nabavke veće vrijednosti može postići bolje uslove ugovaranja.



9. **Knjigovodstveni poslovi**, što u skladu sa zakonskim i podzakonskim aktima podrazumjeva izradu naloga za isplatu putem obrazaca O2 i O3 sa pratećom dokumentacijom, provjera i evidencija finansijskih transakcija, usaglašavanje knjigovodstvenog stanja, popunjavanje i podnošenje svih poreskih obrazaca u nadležnu poresku upravu, kao i izrada godišnjeg obračuna za tekuću godinu, sa popisom stalnih sredstava, sitnog inventara te potraživanja i obaveza. **Poslovi organizovanja vršenja popisa stalnih sredstava i sitnog inventara** kao i potraživanja obaveza za 2017.godinu obavljeni su na način da je formirana Komisija koje je obavile taj posao i izvještaji i popisne liste dostavljene su do 20.01.2018.godine (propisani rok) Ministarstvu finansija i Centralnoj popisnoj komisiji. **Godišnji obračun za 2017.godinu**-završni račun sa svim izvještajima i propisanim obrascima dostavljen je u propisanom roku do 28.02.2018.godinu agenciji "AFIP" d.d. Sarajevo i Ministarstvu finansija Kantona Sarajevo.
10. **Poslovi donošenja opštih akata u Zavodu i poslovi donošenja rješenja o radno-pravnom statusu uposlenika**, realizovani su kako je to propisano i na način da se omogućava rad i funkcionisanje ovog Zavoda. U izvještajnom periodu donijeta su sva potrebna rješenja, a od opštih akata donijet je novi Plan integriteta Kantonalnog zavoda za pružanje besplatne pravne pomoći.
11. **Saradnja sa drugim Zavodima za pružanje pravne pomoći i nevladinim organizacijama registrovanim za pružanje pravne pomoći**, što je propisano odredbom člana 36. Zakona o pružanju besplatne pravne pomoći, u cilju razmjene informacija i prakse u oblasti besplatne pravne pomoći i postizanje viših standarda u pružanju pravne pomoći, Zavod je u izvještajnom periodu nastavio ranije uspostavljenu saradnju kako kroz projekat UNDP-a u **Mreži pružalaca pravne pomoći u BiH** (koja obuhvata sve vladine i jedan broj nevladinih organizacija sa područja cijele BiH) čiji je član ovaj Zavod odmah nakon otpočinjanja rada. Takođe nastavljena je saradnja i sa **nevladnim organizacijama** Fondacija lokalne demokratije, Udruženje "Vaša prava", Asocijacija demokratske inicijative-ADI, Analitika-Centar za društvena istraživanja, Centar za ljudska prava Mostar, Centar za besplatnu pravnu pomoć ženama Zenica i Udruženje građana "Budućnost" Modriča. Od **vladinih organizacija** ostvarena je saradnja sa svim kantonalnim Zavodima u FBiH, a izuzetna saradnja nastavljena je sa Kantonalnim zavodom Zenica koji je prvi počeo sa radom u FBiH tj. 2005.godine. Od ostvarene saradnje posebno treba istaći aktivnosti na realizaciji **potписаног Sporazuma o saradnji u cilju unaprjeđenja sistema besplatne pravne pomoći u Kantonu Sarajevo**, koji su dana 06.11.2014.godine, i s tim u vezi **utvrđene Strategije razvoja sistema besplatne pravne pomoći u Kantonu Sarajevo 2016-2018** sa Akcionim planom.
12. **Saradnja sa nadležnim ministarstvima, centrima za socijalni rad, jedinicama lokalne samouprave i drugim organima**, što je propisano odredbom člana 36. Zakona o pružanju besplatne pravne pomoći u cilju praćenja prakse primjene zakonskih odredbi u određenim oblastima i analiza potreba građana, da svoja prava i obaveze rješavaju uz pružanje besplatne pravne pomoći, te je u izvještajnom periodu ostvarena saradnja sa centrima za socijalni rad i službama za pravnu pomoć u pojedinim Općinama, a od ministarstava u tom periodu najveća i sadržajna saradnja ostvarena je sa Ministarstvom pravde i uprave Kantona



Sarajevo. U 2018.godini dana 02. oktobra potpisana je, na inicijativu Ministarstva za rad, socijalnu politiku, raseljena lica i izbjeglice Kantona Sarajevo, uz podršku OESC-a, a po prijedlogu formirane Radne grupe, **Protokol o saradnji i postupanju u slučajevima protivpravnog ponašanja na štetu djece u Kantonu Sarajevo**.

13. **Poslovi pružanja informacija javnosti o ciljevima, načinu obezbjeđenja i drugim pitanjima iz oblasti besplatne pravne pomoći**, što obuhvata informisanje javnosti o ciljevima rada Zavoda, načinu, kriterijima i uslovima za ostvarivanje prava na besplatnu pravnu pomoć kao i svim drugim pitanjima iz oblasti besplatne pravne pomoći, te je u izvještajnom periodu zajedno sa Fondacijom lokalne demokratije **odštampan informativni materijal** o pružateljima besplatne pravne pomoći, kao i dat pregled institucija koje pružaju besplatnu pravnu pomoć u Kantonu Sarajevo, a takav informativni materijal odštampalo je i u 2018. godini Udruženje "Vaša prava". O radu Zavoda napravljen je **1 TV prilog** i 3 izjave date za novinske agencije i portale. Rad Zavoda predstavljen je kroz **informacije** u printanim medijima kao i na web portalima, uz napomenu da je u saradnji sa Zavodom za informatiku Kantona Sarajevo i UNDP-om napravljena web stranica Zavoda.
14. **Stručno obrazovanje i usavršavanje pravnih zastupnika**, što je obaveza u skladu sa članom 37. Zakona o pružanju besplatne pravne pomoći a sve u cilju kontinuiranog razvoja kvaliteta pružene usluge iz oblasti kojima se pruža besplatna pravna pomoć, te su u izvještajnom periodu svi uposlenici-državni službenici prisustvovali na 14 **seminara-edukacija**, od čega su i u 2018.godini održana 2 seminara na temu zaštita prava djece kroz projekat "Pravda za svako dijete" koje su organizovali UNICEF i UNDP a implementator projekta je Centar za ljudska prava Mostar, koji su u cijelosti snosili troškove seminara, kao i da su učestvovali na jednom seminaru iz građanske oblasti u organizaciji "Udruženja sudija i tužilaca F BiH i RS i jednom seminaru iz krivične oblasti.

VIII PREGLED UNUTRAŠNJE ORGANIZACIJE, KADROVSKE I MATERIJANE OSPOSOBLJENOSTI KANTONALNOG ORGANA

Zavod, kao samostalna upravna organizacija, u cilju obavljanja poslova i zadataka iz djelokruga rada, svoju unutrašnju organizaciju organizovao je i regulisao i novim Pravilnikom o unutrašnjoj organizaciji broj: 28-01-02-134/16 od 17.03.2017.godine, kroz dvije organizacione jedinice i to:

- Sektor za upravni postupak, upravni spor, parnični, vanparnični i izvršni postupak;
- Sektor za krivični i prekršajni postupak,

a izvan ovih organizacionih jedinica obavljaju se poslovi namještenika, imajući u vidu da Zavod ima svoju pisarnicu, te obavezu vođenja finansijsko-računovodstvenih poslova, kao svih drugih administrativno pravnih poslova koji su specifični za ovaj Zavod, prvenstveno imajući u vidu obavezu vođenja 10 različitih upisnika, shodno Pravilniku o obrascima, načinu vođenja i sadržaju evidencija o pruženoj pravnoj pomoći, koji je donijet u skladu sa odredbom člana 48. Zakona o pružanju besplatne pravne pomoći. Od **12 sistematizovanih** radnih mjesta ukupno je odobrena popuna **8** radnih mjeseta, a na dan 31.12.2018.godine u radnom odnosu bilo je 7 uposlenika, jer je jedan uposlenik dao otkaz i prestao mu je radni odnos sa 22.02.2018.godine.

23



Dana 24.07.2018.godine Vladi Kantona Sarajevo uputili smo zahtjev za davanje saglasnosti za popunu upražnjenih radnih mjesta i to dva državna službenika i 1 namještenika (viši referent finansijsko-računovodstvene poslove i poslove vozača-dostavljača) koji je dao otkaz. Zaključkom Vlade Kantona Sarajevo data je saglasnost za popunu radnog mesta namještenika koji je dao otkaz, a za novo upošljavanje po upućenom zahtjevu nije data suglasnost, uz obrazloženje na samoj sjednici Vlade da je prvo potrebno obezbjediti sredstva u Budžetu da bi se odobrilo novo upošljavanje, te da se o tome vodi računa prilikom planiranja i usvajanja Budžeta za 2019.godinu. Iako su u zahtjevu koji je uputio Zavod za budžetskim sredstvima za 2019.godinu zatražena sredstva za novo upošljavanje i povećanje broja uposlenih, to Budžetom nije odobreno već su odobrena sredstva za 8 uposlenika, odnosno za popunu koja je Zavodu odobrena Zaključkom Vlade Kantona Sarajevo od 10.01.2013.godine tj. prije otpočinjanja rada Zavoda.

Procentualno izražena odobrena popuna radnih mjesta na nivou Zavoda je 66%, uz napomenu da već datu suglasnost za popunu radnog mesta namještenika viši referent za finansijsko-računovodstve poslove i poslove vozača-dostavljača potrebno ponovo zatražiti, imajući u vidu krajem 2018.godine donijeti Zaključak Skuštine Kantona Sarajevo o obustavi prijema uposlenika na neodređeno vrijeme. Osim ovog radnog mesta nepotpunjena su 3 radna mesta stručni savjetnik-pravni zastupnik i jedno radno mjesto stručnog saradnika, te bi radi ostvarivanja utvrđenih ciljeva (uvodenje uredovnih dana za općine Kantona Sarajevo koje su udaljene od sjedišta Zavoda, povećanja ušteda u odbranama po službenoj dužnosti, te zadržavanja dostignutog nivoa kvaliteta u radu) i zbog povećanja obima posla neophodno izvršiti popunu sa jednim pravnim zastupnikom i jednim stručnim saradnikom u što skorije vrijeme. Nedostatak kadrova posebno se osjeti u periodu korištenja godišnjih odmora ili odsustva uposlenika po drugom osnovu i u situaciji kada je u pitanju samo jedan uposlenik, što se odražava na obezbjeđenje normalnog funkcionisanja i rada Zavoda. Što se tiče kadrova sa kojim je popunjeno Zavod isti imaju dugogodišnje radno iskustvo, što uz iskazanu stručnost i profesionalizam, kao i sklonost za rad sa licima kojima se pruža besplatna pravna pomoć, te kontinuiranu edukaciju i usavršavanje, predstavlja garanciju da će korisnici Zavoda imati adekvatno pruženu pravnu pomoć u zaštiti i ostvarivanju njihovih prava.

Materijalno-tehnička opremljenost Zavoda je zadovoljavajuća, uz napomenu da u slučaju prijema gore navedenih uposlenika, od strane UNDP u BiH imamo već obezbjeden namještaj i računarsku opremu.

IX NAČIN OSTVARIVANJA SARADNJE SA FEDERALnim ORGANIMA, DRUGIM KANTONIMA, OPĆINAMA, GRADOM SARAJEVOM, OMBUDSMENIMA, NEVLADINIM SEKTOROM I DR.

Kantonalni zavod za pružanje besplatne pravne pomoći od samog početka svoga rada ostvario je neposrednu i sadržajnu saradnju sa Zavodima za pružanje pravne pomoći u drugim Kantonima u Federaciji BiH, a najsadržajnija saradnja ostvarena je sa Kantonalnim zavodom za pružanje pravne pomoći u Zenici, te sa Zavodom u Tuzli, koji imaju višegodišnje iskustvo u pružanju besplatne pravne pomoći, a u 2018.godini nastavljena je saradnja sa Zavodom u Bihaću i Goraždu.

24



Takođe, od samog početka ostvarena je saradnja i sa nevladinim organizacijama, kako kroz Mrežu pružalaca besplatne pravne pomoći u BiH, tako i kroz neposrednu saradnju. S tim u vezi istakli bi prvenstveno saradnju sa Fondacijom lokalne demokratije sa kojom smo pripremili i inicirali potpisivanje Sporazuma o saradnji i koji su osim ove dvije institucije potpisali i Institucija Ombudsmena BIH, Općinski sud u Sarajevu i četiri općine sa područja Kantona Sarajevo.

U dosadašnjem radu ostvarena je uspješna saradnja sa Ministarstvom pravde i uprave Kantona Sarajevo i to od pomoći provođenja aktivnosti na stvaranju uslova za početak rada Zavoda, pa do utvrđivanja Liste branitelja u odbranama po službenoj dužnosti i nadzora nad primjenom Zakona o pružanju besplatne pravne pomoći, kao i na izradi Zakona o izmjenama i dopunama Zakona o pružanju besplatne pravne pomoći. Sa drugim Ministarstvima u Kantonu Sarajevo, a prvenstveno Ministarstvom za rad, socijalnu politiku, raseljena lica i izbjeglice ostvarena je saradnja i ispred Zavoda je imenovan član grupe za izradu Protokola o saradnji i postupanju u slučajevima protivpravnog ponašanja na štetu djece u Kantonu Sarajevo koji je potpisana 02.10.2018.godine a potpisnici su: Ministarstvo za rad, socijalnu politiku, raseljena lica i izbjeglice Kantona Sarajevo; Ministarstvo unutrašnjih poslova Kantona Sarajevo; Ministarstvo unutrašnjih poslova-Uprava policije; Ministarstvo zdravstva Kantona Sarajevo; Ministarstvo pravde i uprave Kantona Sarajevo; Ministarstvo za obrazovanje, nauku i mlade Kantona Sarajevo; Kantonalno tužilaštvo Kantona Sarajevo; Kantonalni sud u Sarajevu; Općinski sud u Sarajevu; Kanotonalni zavod za pružanje besplatne pravne pomoći ; Javna ustanova "Kantonalni centar za socijalni rad" i Kantonalna javna ustanova "Odgajni centar Kantona Sarajevo. Od drugih ministarstava treba istaći saradnju sa Ministarstvom unutrašnjih poslova KS i Ministarstvom za boračka pitanja.

U ovom izvještajnom periodu ostvarena je saradnja i dostavljeni traženi podaci i informacije Visokom sudsakom tužilačkom vijeću BiH o broju i vrstama sudske predmeta u kojim je pružena besplatna pravna pomoć, a u 2018. godini prisustvovali smo sastanku na kome se razmatrala saradnja sa Zavodima za pružanje pravne pomoći i dogovoren je da će se dostaviti spiskovi pružalaca pravne pomoći koji zastupaju na sudu radi evidentiranja u CMS.

Intenzivna, kontinuirana i veoma uspješna saradnja ostvarena je sa UNDP u BiH u okviru finansijskih mogućnosti za 2018. godinu, a treba istaći kontakte i saradnju koja je u izvještajnom periodu nastavljena i sa drugim organizacijama: UNCEF-om, IOM, USAID, što će se nastaviti i u narednom periodu, o čemu su postignuti dogovori. Od međunarodnih organizacija u 2018.godini nastavljena je iz ranijih godina ostvarena dobra saradnja sa OSCE-om, Misija u Bosni i Hercegovini.

U cilju razmjene informacija i prakse u oblasti besplatne pravne pomoći i postizanja viših standarda u pružanju pravne pomoći, te u cilju praćenja prakse primjene zakonskih odredbi u određenim oblastima i analize potreba građana da svoja prava i obaveze rješavaju uz pružanje besplatne pravne pomoći, Zavod će u skladu sa odredbama Zakona o pružanju besplatne pravne pomoći i u narednom periodu ostvarivati u okviru svojih kapaciteta i zainteresovanosti drugih subjekata i proširivati saradnju sa drugim Zavodima za pružanje pravne pomoći i nevladnim organizacijama, te nadležnim Ministarstvima, Centrima za socijalni rad, jedinicama lokalne samouprave i drugim organima.

Broj: 28-01-05-62/2019

Sarajevo, 14.03.2019.godine

DIREKTOR

Velija Nuhanović

25



web: <http://zbpp.ks.gov.ba>
e-mail: zbpp@zbpp.ks.gov.ba
Tel: + 387 (0) 33 275-660, Fax: + 387 (0) 33 275-661
Sarajevo, Branilaca Sarajeva 21



**FINANSIJSKI IZVJEŠTAJ
KANTONALNOG ZAVODA ZA PRUŽANJE BESPLATNE PRAVNE POMOĆI
ZA 2018 GODINU**

UVOD

Članom 22. Zakona o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo" broj:2/12- Prečišćeni tekst, 41/12 i 8/15), regulisano je formiranje Kantonalnog zavoda za pružanje besplatne pravne pomoći, koji vrši upravne i stručne poslove koji se odnose na pružanje besplatne pravne pomoći građanima lošeg imovinskog stanja, na način i pod uslovima utvrđenim zakonom kojim se reguliše pružanje besplatne pravne pomoći.

Pravilnikom o unutrašnjoj organizaciji broj: 28-01-02-134/16 od 17.03.2017.godine propisano da se u cilju obavljanja poslova i zadataka iz djelokruga rada organizuju dvije organizacione jedinice i to:

- sektor za upravni postupak, upravni spor, parnični, vanparnični i izvršni postupak;
 - sektor za krivični i prekršajni postupak;
- a izvan ovih organizacionih jedinica obavljaju se poslovi namještenika.

Poslove iz nadležnosti i djelokruga rada Zavoda u toku 2018.godine obavljalo je do 22.02.2018.godine 8 uposlenika i to: 1 rukovodilac koji ima status imenovanog lica, 4 državnih službenika i 3 namještenika a od 22.02.2018.godine sa 31.12.2018.godine bilo je ukupno 7 uposlenika (umjesto 3, 2 naještenika) a po pravilniku je sistematizovano 12 radnih mesta. Pored nepotpunjeno mesta namještenika, koji je dao otkaz i kome je prestao radni odnos, nepotpunjena su radna mjesta za 3 pravna zastupnika i 1 stručnog saradnika, koje radno mjesto je predviđeno novim Pravilnikom, umjesto pravnog zastupnika.


FINANSIJSKI IZVJEŠTAJ

Planirani rashodi Kantonalnog zavoda za pružanje besplatne pravne pomoći u 2018.godini iznosili su 368.884,00 KM, a izvršeni su u iznosu 356.340,36 KM ili 96,60%. Kantonalni zavod za pružanje besplatne pravne pomoći finansirao se isključivo iz budžetskih sredstava, a sve transakcije vršene su putem jedinstvenog računa Trezora, odnosno Ministarstva finansija Kantona Sarajevo.

1



web: <http://zbpp.ks.gov.ba>
e-mail: zbpp@zbpp.ks.gov.ba
Tel: + 387 (0) 33 275-660, Fax: + 387 (0) 33 275-661
Sarajevo, Branilaca Sarajeva 21



U slijedećem dijelu teksta daje se tabelarni pregled zakonskog Budžeta za 2018.godinu, finansijski plan za 2018.godinu, izvršenje rashoda za 2018.godinu, te izvršenje rashoda za 2017.godinu, sa procentom izvršenja rashoda za 2018.godinu u odnosu na zakonski Budžet za 2018.godinu.

1 KONTO	2 OPIS	3 ZAKONSKI BUDŽET 2018	4 FINANSIJSKI PLAN 2018	5 IZVRŠENJE JAN.-DEC.-18	6 IZVRŠENJE ZA 2017	7 % IZVRŠ. (5/3)
UKUPNO TEKUCI IZDACI		366,534.00	365,993.00	354,891.36	357,355.51	96,82
611000	Plaće i naknade troškova zapos.	271,834.00	271,293.00	267,786.08	267,883.16	98,51
611100	Bruto plaće i naknade	246,809.00	246,809.00	246,807.45	241,215.41	99,99
611200	Naknade troškova zaposlenih	25,025.00	24,484.00	20,978.63	26,667.75	83,83
XAA001	Nak.tros. Prevoza zaposlenih	4,600.00	4,600.00	4,505.00	5,088.00	97,93
XAA002	Naknada za topli obrok	13,500.00	13,400.00	13,390.13	14,775.75	99,19
XAA003	Naknada za regres za god.odmor	3,525.00	3,084.00	3,083.50	3,468.00	87,47
XAA005	Nak.u slučaju smrti i teže inva.	3,400.00	3,400.00	0.00	3,336.00	0,00
612000	Doprinosi poslodavca	25,917.00	25,917.00	25,914.75	25,327.61	99,99
613000	Izdaci za materijal i usluge	68,783.00	68,783.00	61,190.53	64,144.74	88,96
613100	Putni troškovi	1,200.00	1,200.00	1,198.50	443.50	99,87
613200	Izdaci za energiju	7,000.00	7,000.00	4,130.80	4,821.49	59,01
613300	Izdaci za komunalne usluge	4,000.00	4,000.00	2,505.91	2,919.50	62,65
613400	Nabavka materijala	6,000.00	6,000.00	5,993.62	7,244.23	99,89
613500	Izdaci za usluge prevoza i goriva	1,000.00	1,000.00	527.00	531.05	52,7
613600	Unajmljivanje imovine i opreme	40,000.00	40,000.00	39,842.76	39,842.76	99,61
613700	Izdaci za tekuće održavanje	500.00	500.00	278.78	0.00	55,76
613800	Izd.osig.,bank.usl.i usl.pl.prom.	2,000.00	2,000.00	901.25	1,357.00	45,06
613900	Ugovorene i dr.posebne usluge	7,083.00	7,083.00	5,811.91	6,985.21	82,05
613900	Ugovorene i dr.posebne usluge	5,000.00	5,000.00	3,926.40	5,013.07	78,53
XAK001	Pos.nak na doh.za zaš.od pr.nep	783.00	783.00	780.46	766.06	99,67
XAK002	Pos.nak. za podstic. rehab. I zapošlj	1,300.00	1,300.00	1,105.05	1,206.00	85
UKUPNO TEKUCI TRANSFERI		100.00	0.00	0.00	0.00	0.00
614000	Tekući transferi	100.00	0.00	0.00	0.00	0.00
614800	Ostali transferi-povrat i drugo	100.00	0.00	0.00	0.00	0.00
UKUPNO ZA NABAV-STALNIH SRED.		2,250.00	2,250.00	1,449.00	368.70	64,4
821000	Izdaci za nabavku stalnih sred.	2,250.00	2,250.00	1,449.00	368.70	64,4
821300	Nabavka opreme	2,250.00	2,250.00	1,449.00	368.70	64,4
SVEUKUPNO RASHODI I IZDACI		368,884.00	368,243.00	356,340.36	357,724.21	96,60

Broj zaposlenih

7

7

8

Dajemo obrazloženje po kodovima iz predočene tabele o tekućim rashodima i izdacima.

Tekući izdaci organa uprave

-Bruto plate

Bruto plate u 2018.godini isplaćene su, u skladu sa važećim zakonskim i podzakonskim propisima koji regulišu ovu materiju, u ukupnom iznosu od 246.807,45 KM, što iznosi 99,99% od Budžetom odobrenih sredstava.

2



-Naknada troškova zaposlenih

Na poziciji naknada troškova zaposlenih utrošena su sredstva u iznosu od 20.978,63 KM što iznosi 83,83% od Budžetom odobrenih sredstava, a rashodi se odnose na sljedeće:

Naknade za prevoz na posao i sa posla uplaćena su u ukupnom iznosu 4.505,00 KM što iznosi 97,93% od Budžetom odobrenih sredstava.

Naknada za topli obrok iznosila je 13.390,13 KM što iznosi 99,19% od Budžetom odobrenih sredstava.

Naknada za regres za godišnji odmor isplaćen je u iznosu od 3.083,50 KM , što iznosi 87,47% od Budžetom odobrenih sredstava.

-Doprinosi poslodavca i ostali doprinosi

Doprinosi poslodavca i ostali doprinosi isplaćeni su u skladu sa zakonskim propisima koji regulišu ovu materiju, u iznosu od 25.914,75 KM što iznosi 99,99% od Budžetom odobrenih sredstava.

-Izdaci za materijal i usluge

Sa pozicije "Izdaci za materijal i usluge " utrošena su sredstva u ukupnom iznosu 61.190,53 KM što iznosi 88,96% od Budžetom odobrenih sredstava, a odnose se na sljedeće:

Putni troškovi ostvareni su u iznosu 1.198,50 KM što iznosi 99,87% od Budžetom odobrenih sredstava, uz napomenu da su ovo troškovi prisustva seminaru iz građanske i krivične oblasti, te troškove dnevničica za službena putovanja radi prisustva seminarima koje su organizovali UNDP, UNICEF i Centar za ljudska prava u Mostaru koji su snosili troškove smještaja i ishrane i toškove edukatora.

Izdaci za energiju, ostvareni su rashodi u iznosu od 4.130,80 KM što iznosi 59,01% od Budžetom odobrenih sredstava.

Izdaci za komunalne usluge, ostvareni su rashodi u iznosu 2.505,91 KM što iznosi 62,65% od Budžetom odobrenih sredstava.

Nabavka materijala, ostvareni su rashodi u iznosu od 5.993,62 KM što iznosi 99,89% od Budžetom odobrenih sredstava.

Izdaci za usluge prevoza i goriva ostvareni su u iznosu od 527,00KM što iznosi 52,70% od Budžetom odobrenih sredstava.

Izdaci za unajmljivanje imovine i opreme, ostvareni su rashodi u iznosu 39.842,76 KM što iznosi 99,61% od Budžetom odobrenih sredstava.

Izdaci za tekuće održavanje ostvareni su rashodi u iznosu od 278,78 KM što iznosi 55,86% od Budžetom odobrenih sredstava.

Izdaci osiguranja, bankarskih usluga i usluga platnog prometa ostvareni su u iznosu od 901,25 KM što iznosi 45,06% od Budžetom odobrenih sredstava a odnose se na troškove obaveznog osiguranja prilikom registracije putničkog motornog vozila i obaveznog osiguranja uposlenika.



Ugovorene i druge posebne usluge ostvarene su u iznosu od 5.811,91 KM što iznosi 82,05% od Budžetom odobrenih sredstava, a ti troškovi nastali su po osnovu: preplata na Službene novine Kantona Sarajevo i Službene novine FBiH kao i troškovi nabavke stručne literature i troškovi uplate kotizacija za seminare, usluge štampanja propisanih obrazaca i uvezivanja službenih novina i troškovi prevođenja Zakona o pružanju besplatne pravne pomoći Kantona Sarajevo, Pravilnika o unutrašnjoj organizaciji KZBPP, Studija slučaja i pregled rada Kantonalnog zavoda za pružanje besplatne pravne pomoći za potrebe Misije strukovne revizije u Bosni i Hercegovini iz oblasti besplatne pravne pomoći u kontekstu pripreme mišljenja Evropske komisije o zahtjevu za članstvo Bosne i Hercegovine u Evropskoj uniji koja je organizovana i provedena u periodu od 02. do 06. jula 2018.godine uz sudjelovanje dvojice eksperata za besplatnu pravnu pomoć iz Holandije i Škotske i predstavnika Evropske komisije.

Nabavka stalnih sredstava

-Nabavka opreme

U 2018.godini ostvareni su rashodi u iznosu 1.449,00 KM, što iznosi 64,40% od Budžetom odobrenih sredstava, uz napomenu da je u 2018.godini sa ove pozicije vršena preraspodjela.

U skladu sa Zaključkom Vlade Kantona Sarajevo broj: 02-05-21955-27.2/16 od 30.06.2016.godine dajemo pregled iznosa neto plaća za uposlenike Kantonalnog zavoda kako slijedi:

	2014	2015	2016	2017	2018
Prosječan broj zaposlenih	8	8	8	8	7
Prosječna isplaćena plaća	1.438,65	1.438,65	1.438,65	1.475,14	1652,85

U odnosu na iznos neto plaća ističemo da je u Zavodu do 2018.godine bilo uposleno 5 državnih službenika a donošenjem Zakona o državnoj službi u Kantonu Sarajevo rukovodilac-direktor Zavoda ima status imenovanog lica, te su u 2018.godini bila 4 državna službenika, koji su na osnovu člana 18. Zakona o plaćama i naknadama u organima vlasti Kantona Sarajevo raspoređeni u 3 platna razreda i to: u II platni razred -1 državni službenik (u 2018.godini rukovodilac koji ima status imenovanog lica); u III platni razred -2 državna službenika i u IV platni razred -2 državna službenika. Tri namještenika (a u 2018.godini 2 namještenika) uposlena u Zavodu u skladu sa članom 19. Zakona o plaćama i naknadama u organima vlasti Kantona Sarajevo raspoređeni su u V platni razred. Što se tiče podataka o drugim primanjima uposlenika Zavoda ističemo da uposlenici nisu bili članovi nikakvih komisija, nadzornih odbora i sl. izuzev što je jedna državna službenica od 19.05.2017.godine, kada je Rješenjem Vlade Kantona Sarajevo imenovana za člana Disciplinske komisije, ali je dana 23.02.2018.godine podnijela ostavku iz razloga povećanog obima posla u Zavodu i za taj period nije primila naknadu. Članovi Komisije za popis stalnih sredstava i sitnog inventara i za popis obaveza i potraživanja nisu imali naknadu za taj rad.



U finansijskom smislu 2018.godina za Kantonalni zavod za pružanje besplatne pravne pomoći uspješno je okončana, imajući u vidu da je Zavod uspješno ostvarivario svoju ulogu i pružao besplatnu pravnu pomoć u skladu sa zakonom, fizičkim licima koja na to imaju pravo, te da je u 2018.godini ukupno bilo 3.611 korisnika koji su unijeti u bazu podataka, a u odnosu na ranije godine povećan je broj predmeta u radu koji je iznosio 1902 predmeta, što je obrazloženo u Izvještaju.

Nadalje, u vezi sa finansijskim izvještajem treba istaći činjenicu da su angažovanjem pravnih zastupnika koji se nalaze na Listi branilaca u odbranama po službenoj dužnosti, u 2018.godini ostvarene uštede u Budžetu Kantona Sarajevo u iznosu od 207.364,00 KM, na ime naknada odbrana po službenoj dužnosti, koje se plaćaju advokatima za odbrane po službenoj dužnosti, što predstavlja procent od 58,19 % ukupnih rashoda koje je ostvario Zavod iz Budžeta za 2018.godinu, odnosno 84,02% rashoda na ekonomskom kodu 611 100-bruto plaće i naknade za 8 uposlenika do 22.02.2018.godine a od tada do 31.12.2018.godine za 7 uposlenika Zavoda. Nadalje, treba istaći činjenicu da su u svim drugim postupcima za građane tj. korisnike usluga Zavoda ostvarene uštede u iznosu od 215.911,00 KM, odnosno taj iznos su pravni zastupnici Zavoda svojim angažovanjem i preuzimanjem potrebnih pravnih radnji uštredjeli građanima, jer bi iste bez tog angažovanja platili punomoćnicima.

Sa adekvatnom kadrovskom popunjenošću ovog Zavoda, odnosno u narednom periodu neophodnim povećanjem broja uposlenih i to jednog pravnog zastupnika za krivični i prekršajni postupak i jednog stručnog saradnika, čime bi ostvarene uštede kako za građane tako i za Budžet bile značajno veće, kao i ostvareni značajniji rezultati u broju pruženih usluga korisnicima u skladu sa Zakonom o pružanju besplatne pravne pomoći. Angažovanjem pravnog zastupnika za krivični i prekršajni postupak ostvarile bi se uštede u budžetu kroz odbrane po službenoj dužnosti u iznosu kojim bi bili "pokriveni" izdaci za bruto plaće i naknade za oba uposlenika. Ovu konstataciju potvrđuje činjenica da su u svim dosadašnjim godinama angažovanjem dva pravna zastupnika i direktora kao pravnog zastupnika (koji zbog drugih obaveza i nadležnosti nije u mogućnosti posvetiti se samo odbranama po službenoj dužnosti) ostvarene uštede u budžetu u kojima je u prosjeku od oko 87% bio "pokriven" ukupan iznos sredstava isplaćenih za bruto plaće i naknade 8 uposlenika Zavoda. S tim u vezi treba imati u vidu da **osnivanje Zavoda prvenstveno ima za cilj** institucionalno pružanje besplatne pravne pomoći i omogućavanje korisnicima pristup pravdi pred sudom i drugim organima i **u svim drugim postupcima**, osim krivičnog postupka, gdje je to obezbjeđeno kroz odbrane po službenoj dužnosti. Neophodnost i opravданost povećanja broja uposlenih vidljivo je kako iz konstantnog povećanja broja korisnika, broja formiranih predmeta i broja ukupno pruženih usluga, tako i iz podatka da su u periodu od predhodnih 6 godina, tj. sa 31.12.2018.godine ukupni rashodi, odnosno izvršenje budžeta ovog Zavoda iznosili 1.830.306,18 KM, a da su uštede po osnovu odbrana po službenoj dužnosti i uštede za korisnike kojima je pružena besplatna pravna pomoć, veće od tog iznosa za 529.059,82 KM.

Broj: 28-01-14-62/2019
Sarajevo, 14.03.2019.godine



web: <http://zbpp.ks.gov.ba>
e-mail: zbpp@zbpp.ks.gov.ba
Tel: + 387 (0) 33 275-660, Fax: + 387 (0) 33 275-661
Sarajevo, Branilaca Sarajeva 21



Dostavljen 22.3.2019.
u 15²⁰

Bosna i Hercegovina
Federacija Bosne i Hercegovine
KANTON SARAJEVO
**Kantonalni zavod za pružanje
besplatne pravne pomoći**



Босна и Херцеговина
Федерација Босне и Херцеговине
КАНТОН САРАЈЕВО
**Кантонални завод за пружање
бесплатне правне помоћи**

Bosnia and Herzegovina
Federation of Bosnia and Herzegovina

CANTON SARAJEVO
Cantonal Institute for Free Legal Aid

Broj: 28-01-05-62/19
Sarajevo, 22.03.2019.godine

**KANTON SARAJEVO
VLADA KANTONA**

PREDMET: Izvještaj o radu i finansijski izvještaj Kantonalnog zavoda za pružanje besplatne pravne pomoći za 2018.godinu

U prilogu akta dostavljamo Vam Izvještaj o radu i finansijski izvještaj Kantonalnog zavoda za pružanje besplatne pravne pomoći za 2018.godinu u skladu sa Odlukom o metodologiji izrade i donošenju programa rada i izvještaja o radu Vlade Kantona Sarajevo i kantonalnih organa ("Službene novine Kantona Sarajevo" broj: 29/12, 11/17 i 8/18), radi dostavljanja Skupštini Kantona Sarajevo na razmatranje i usvajanje.

S poštovanjem,

PRILOG:

1. Prijedlog zaključka Skupštine Kantona Sarajevo o usvajanju Izvještaja o radu i finansijskom izvještaju Kantonalnog zavoda za pružanje besplatne pravne pomoći, sa obrazloženjem i izvodom iz Zakona o pružanju besplatne pravne pomoći i Zakona o organizaciji organa uprave u FBiH x 2
2. Izvještaj o radu i finansijski izvještaj Kantonalnog zavoda za pružanje besplatne pravne pomoći za 2018.godinu x 2
3. CD sa snimljenim materijalom



web: <http://zbpp.ks.gov.ba>
e-mail: zbpp@zbpp.ks.gov.ba
Tel: + 387 (0) 33 275-660,
Fax: + 387 (0) 33 275-661
Sarajevo, Branilaca Sarajeva 21

